

道光遵義府志

遵義府志卷三十三

列傳一

孔子言君子疾沒世而名不稱孟子稱一鄉之善士  
一國之善士士誠善欲無名得乎遵義於古地當一  
大國犍脤延孕時發菁華雖所就各殊要有不可磨  
滅爲山川張者茲慎考前載嚴覈見聞苟詳一節類  
以序次甄其品別卽樹風聲葛洪云託竹帛爲世寶  
斯言至矣後生可畏鄉人先酌邴原如在請薄東家  
若及圈羊則誠不敢

漢

舍人

經典釋文敘錄爾雅犍爲文學注三卷本

注一云犍爲郡文學卒史臣舍人漢武帝時待詔闕中卷隨書經籍志梁有漢犍爲文學爾雅三卷亡按前輩言爾雅家皆不詳文學姓名鄉里以釋文本注云犍爲郡文學卒史臣舍人考之于郡吏銜下加臣某必其上此注時自題則舍人其姓名也廣韻云舍人又姓舍姓別無所見意其所據姓苑諸書必有引注爾雅之文學爲證者觀陸氏於注中備錄其銜亦所以備其姓名使人有考其大題不云舍人而云犍爲文學者蓋當時此注通如此稱陸雖得其舊本原題

驟改恐人難卽曉故具之注中又諸經疏所引爾雅舊注多直稱舍人曰與孫炎李巡樊光等曰一例愈知舍人爲姓名也其鄉里考漢書衡山王傳注如淳曰漢儀注吏四百石以下自除國中又黃霸傳注如淳曰三輔郡得仕用他郡人而卒史獨二百石所謂尤異者也後漢百官志每郡皆置諸曹掾史本注諸曹略如公府曹無東西曹劉昭注引漢官云河南尹員吏九百二十七人百石卒史二百五十人文學守助掾六十八又諸卿下注皆有文學百石又大尉公下本注漢初掾史辟皆上言之故有秩比命士其所

不言則爲百石屬其後皆自辟除故通爲百石然則文學卒史皆百石也洪适隸釋巴郡太守張納碑陰有文學主事掾文學主事史文學掾文學史四銜繁長張禪等題名有郡文學師隸續末卷無名碑陰亦有文學史此之文學其爲主事史與史與師未可知其聯稱卒史自是當時史員通稱而其秩之爲百石固無疑者當時四百石下自除國中則文學必掾爲人可知掾爲初治監其卽監人或他縣人不可考矣若漢書儒林傳稱公孫宏等議治禮掌故以文學禮義爲官遷監滯請選擇其秩比百石以下補郡太守

卒史皆各二人邊郡一人不足擇文學掌故補郡屬  
請著功令此之文學既稱繫犍爲其爲郡曹明甚必  
非如儒林傳所云者不得因彼致疑至陸云漢武帝  
時待詔者文選揚雄甘泉賦序召雄待詔承明之庭  
李善注諸以材術見知直於承明待詔卽見故曰待  
詔漢書朱買臣傳詣闕上書久不報待詔公車東方  
朔傳上書自薦令待詔公車枚皋傳上書北闕召入  
見待詔賈捐之傳元帝卽位上疏言得失詔待詔金  
馬門王褒傳宣帝時召高才劉向張子儵華龍柳褒  
等待詔金馬門上徵褒至詔褒爲聖主得賢臣頌令

襄與僑等並待詔文學待詔必是上爾雅注後待上  
詔除與諸人等至其後爲何官史失事實雖陸已莫  
能詳也又考後漢百官志注引漢官曰太史待詔五  
十七人其別有治厯廬宅日時易筮典禮籍氏許  
氏典昌氏嘉法請雨解事醫等十三職又引靈臺待  
詔四十二人其別有候星候日候風候氣候暑景候  
鍾律舍人等七職文學旣上此注必承明金馬中人  
不與諸小術家爲伍其非靈臺太史所屬待詔明矣  
或曰舍人卽文學計徵所授之官後漢注靈臺待詔  
其一人舍人陸言漢武帝時待詔卽謂此是以舍人

與待詔傳會曲說大不然也古人注書結銜之例其私成者則曰某官某人其上於朝者則云某官臣某人若以舍人爲官則是某官臣下又云某官何以解耶盧文弨釋文考證云李善注文選羽獵賦引爾雅注作郭舍人考漢書東方朔傳武帝初有幸倡郭舍人常侍左右注爾雅者疑非此人盧疑之是也武帝建元六年始開犍爲文學爲郡吏必在其後至上書待詔尤必多厯年所其非武帝初幸倡無疑洪頤煊讀書叢錄云爾雅犍爲文學注文選注引作郭舍人西京雜記郭威字文偉茂陵人好讀書以謂爾雅周



公所制而有張仲孝友張仲宣王時人非周公之制明矣疑卽此人考漢茂陵右扶風縣文學若卽茂陵郭威則與漢四百石下吏自除國中之制不合又與陸氏所書臣舍人之銜大謬且注疏家亦決不譏議本經也此緣選注偶誤致起文昭之疑頤煊又緣誤注而別求一郭姓者以當之則誤之又誤矣論爾雅一書郭景純稱爲九流津涉六藝鈐鍵今經歷代注疏童習白茫尙難竟業其在豹鼠未辨以前蓋傳授蔑如矣文學當挾書方除遽能當名辨物首啟譚奧非天授爲此經大師能如是乎經義考於爾雅舍人

注稱爲漢儒釋經之始今觀唐宋諸家所引上下卷  
遺文其章句如菟奚顓凍中鳩爲一物鹵蕈爲一物  
櫬梧來合巢櫬采薪采薪卽薪及毘劉覲鬚與暴樂  
第離別句皆視孫郭爲確其異文如謂作彙驥作雞  
狗作狗鷦鷯作兼兼玼作濯皆先秦最古之本其訓  
釋如蝮一名虺亢訓鳥高飛跼蹄訓溷蹄茅者昧之  
明跳者躍之間多合先漢相傳古義所存雖吉光片  
羽而前輩多據以證注家之誤蓋其專精之至也當  
孝武通西南夷初置犍爲繼置牂柯汶山諸郡其時  
榛榛狉狉風教睢盱文學以郡人膺學史選詣闕上

書旣挺生古所未臣之地而卽注古所未訓之經其  
通貫百家學究天人與相如張叔輩上下馳騁同闢  
一代絕詣淑文翁之雅化導道真之北學南中若夔  
先師斷推文學鼻祖前人數典皆竟忘之故詳著爲  
人物傳首

盛覽 牂柯人西京雜記司馬相如友人盛覽字  
長通牂柯名士嘗問以作賦相如曰合纂組以成文  
列錦繡以爲質一經一緯一宮一商此賦之迹也賦  
家之心包括宇宙總覽人物斯乃得之於內不可得  
而傳覽乃作合組歌列錦賦而退終身不復敢言後

賦之心矣邵遠平續宏簡錄按漢書司馬相如入西南夷上人盛覽從學歸以授其鄉人文教始開

尹珍

華陽國志序志文學荊州刺史尹珍字道真

母斂人又南中志明章之世母斂人尹珍字道真

以生遐裔未漸庠序乃遠從汝南許叔重授五經又

師事應世叔學圖緯通三材還以教授於是南域始

有學焉珍以經術選用歷尚書丞郎荊州刺史而世

叔爲司隸校尉師生並顯後漢書西南夷傳桓帝時

郡人尹珍自以生於荒裔不知禮義乃從汝南許慎

應奉受經書圖緯學成還鄉里教授於是南域始有

學焉珍官至荊州刺史

按常志明章當是桓帝之誤考後書奉傳奉曾祖在和帝時爲河南尹已在章帝後奉以桓帝延熹中破武陵蠻功薦爲司隸校尉常氏言珍爲刺史世叔司隸校尉師生並顯可知桓帝時爲是且范書必據常志若本是明章無由作桓帝前後差誤八十餘年也

又按漢毋斂縣地在今貴陽都勻二府間說詳沿革門牂柯十七縣考今正安州北有毋斂壩有尹珍宅故址綏陽縣有唐廣明間尹公講堂碑當時

道真還鄉教授自非一處而沾旬暨人必較他方  
渥唐去漢未遠尙能指其講堂之碣流澤未湮必  
非附會又降珍之山郡名以錫見御覽所引十道  
志必皆先時重繫教思因地寄慕使然其壩名毋  
斂宅稱故址事同一科綏陽志入之流寓最是但  
又以爲珍州樂源人殊失考蓋由前人景重名賢  
唯恐非我邦所有致以唐人州郡強作漢儒鄉里  
不知道真開南中之學凡屬牂柯舊縣無地不可  
稱先師食鄉社而實事求是正無庸因後人之私  
述易古籍之明文致遷就附會如襄陽昌黎之轆

輶不明也今與傅尹二公各按實詳錄雖皆非警  
產而風化所由決不容昧故仍謹載更考論以貽  
來者

傅寶尹貢華陽國志序志巴郡太守傅寶  
字紀圖平夷人又南中志云平夷傅寶夜郎尹貢亦  
有名德歷尚書郎長安令巴郡太守彭城相號南州  
人士

按通志云寶歷尚書郎長安令貢歷巴郡太守彭  
城相誤蓋因南中志書官聯屬強分以屬二人而  
未檢序志故也序志於寶題巴郡太守是巴守爲

寶官之終則歷尙書郎長安令巴郡太守者皆寶  
貢止爲彭城相無疑也漢平夷縣卽今大定府地  
夜郎縣在今興義府及安順大定之西南境詳沿  
革門牂柯十七縣考

又按貴州通志文學門首列應世叔云牂柯人以  
經術辟司隸校尉蓋因誤讀常志不知世叔卽應  
奉之字致有此謬不足深辨略附及之

晉

謝恕 華陽國志序志忠義冠軍將軍寧州刺史  
謝恕字茂理母斂人又後賢志侯馥傳王遜議欲遷



牂柯太守謝恕爲涪陵太守出屯巴郡之把口表馥  
爲江陽太守住江陽之泚源撫卹蠻獠克復江陵馥  
招夷獠繕舟艦爲進取計預白遜請軍移恕俱出涪  
陵又南中志永昌元年晉用南陽尹奉爲寧州刺史  
南夷校尉威刑緩鈍政治不理咸和八年遂爲李雄  
弟壽所破獲南中盡爲雄有惟牂柯謝恕不爲壽所  
用遂保郡獨爲晉按本書李志云八年奉舉州委官  
至撫夷中郎將寧州刺史冠軍當脫將晉書載記李  
壽遣其鎮東大將軍李奕征牂柯太守謝恕保城  
守者積日不拔會奕糧盡引還並新纂

按毋斂考見前通志云恕永昌元年爲牂柯太守  
時尹奉爲李壽所破又云官至忠義冠軍將軍並  
誤常志書尹奉爲壽所破獲牂柯謝恕不爲壽用  
在咸和八年其前書永昌元年謂尹奉刺寧州之  
年也且侯馥傳言王遜議遷牂柯太守謝恕爲涪  
陵是孟才旣逐遜卽以恕守牂柯旣又遷之涪陵  
皆在永昌前也恕至咸和仍爲牂柯者意恕遷涪  
陵後牂柯旋爲雷炤董霸等破以降李雄而守牂  
柯之文猛又爲雄執故仍以恕爲之也至忠義二  
字乃常志人物品目如文學政事之比其官名止

冠軍將軍通志恕傳亦悉據常志爲之讀未審遂至乖錯

宋

趙高峰 今桐梓人官至長沙太守元祐八年告歸

勅賜所居名青蓮院著有詩集今亡

新採

冉從周 明統志郡人舉進士時呼爲破荒冉家歷官爲珍州守有善狀

楊孟奇 今桐梓人征南平有功授奮勇將軍

新採

冉璉 冉璞 通志遵義人兄弟俱有文武才

辟召皆不赴余玠撫四川築招賢館禮士往謁之禮

待甚至宋史余玠傳播州冉氏兄弟璉璞有文武才  
隱居蠻中前後閫帥辟召堅不肯起聞玠賢相謂曰  
是可與語矣遂詣府上謁玠素聞冉氏兄弟刺入卽  
出見之與分庭抗禮賓館之奉冉安之若素有居數  
月無所言玠將謝之迺爲設宴玠親主之酒酣坐客  
方紛紛競言所長璉兄弟飲食而已玠以微言挑之  
卒默然玠曰是觀我待士之禮何如耳明日更闢別  
館以處之且日使人窺其所爲兄弟終日不言惟對  
踞以堊畫地爲山川城池之形起則漫去如是又旬  
日請見玠屏人曰某兄弟辱明公禮遇思有以少裨

蓋非敢同衆人也爲今日西蜀之計其在徙合州城  
乎玠不覺躍起執其手曰此玠志也但未得其所耳  
曰蜀口形勝之地莫若釣魚山請徙諸此若任得其  
人積粟以守之賢於十萬師遠矣巴蜀不足守也玠  
大喜曰玠固疑先生非淺士先生之謀玠不敢掠以  
歸已遂不謀於衆密以其謀聞於朝請不次官之詔  
以璫爲承事郎權發遣合州璞爲承務郎權通判州  
事徙城之事悉以任之命下一府皆譔然同辭以爲  
不可玠怒曰城成則蜀賴以安不成玠獨坐之諸君  
無預也卒築青居大獲釣魚雲頂天生凡十餘城皆

因山爲壘碁布星分爲諸郡治所屯兵聚糧爲必守計且誅潰將以肅軍令又移金戎於大獲以護蜀口移沔戎於青居興戎先駐合州舊城移守釣魚共備內水移利戎於雲頂以備外水於是如臂使指氣勢聯絡明鄒智跋釣魚城志後予嘗觀天下之大勢矣立國於北者恃黃河之險立國於南者恃長江之險而蜀實江之上游也敵人有蜀則舟師可自蜀浮江而下而長江之險敵人與我共之矣由此言之守江尤在於守蜀也元南侵而必自蜀始豈非有見於此歟冉氏弟兄受知余玠而首畫城釣魚之策王堅張

珥且戰且守至死不渝豈非有見於此歟向使無釣  
魚城則無蜀久矣無蜀則無江南久矣宋之宗社豈  
待巖山而後亡哉嗚呼當茲城之成也宋無西顧之  
憂元無東下之路使賈似道能用汪立信之策陳宜  
中能用文天祥之策下游與上游齊奮內郡與外郡  
併力天下事未可知也天時不齊人事好乖令人有  
千古不平之憤

全蜀藝文志

元

楊朝文 今桐梓人官雲南大理同知有政聲

新採

明

遵義縣

何敏樹 正德中浪跡山水寄興詩歌飄然有出塵之致著有滄浪孺子集

陳志

王 沛 自幼與物無忤至老樂善不倦當播酋虐焰之時保身遠引特以齒德舉作鄉賓

同

王其質 明正統間有王壽卿者山西陽曲人由雲南按察遷四川右藩道播州病殂子瑛葬之播遂家焉楊氏聘瑛爲師嗣補播州儒學孫世昌爲楊氏總把官世昌子晟繼之楊氏請於部給冠帶管事是生材材貌俊偉秀鬚眉人以王梓潼呼之襲冠帶總把



官性溫才敏能決疑獄時有問事無過王總把之謠  
楊應龍以江外司屬未盡馴化以材爲提調湄甕五  
里八排地方總管兼制兩司長官任事八年上下恬  
協是生其質其質覩應龍之虐屢召用不就遂與七  
大姓謀訐奏應龍凶逆狀先挈族避匿龍里以議覆  
勘未果後其質兩赴京申奏奉旨於重慶與應龍對  
勘兄其斌當會鞫時指髮裂眦手捶應龍而歷數其  
罪狀兩院壯其氣俠之至萬厯戊戌勦議定庚子春  
楚將陳璘由湄龍路進師其質以湄甕地舊屬提調  
至軍前獻策璘令率所管口把士兵爲鄉導進三渡

關克青蛇寨戰敗楊珠同破海龍壘六月播平敘功  
擬授官其質辭曰向者一夫播虐某等陳籲當寧九  
死一生情非得已今幸天威掃除某獲保首領攜妻  
兒還鄉閭葺理荒業死瞑目矣更敢希榮寵乎遂歸  
休老適黔蜀爭渭河楊相贖戶地界總制王象乾召  
知根播民詢決其質趨綦江至夷溪卒見其賓工詩  
晚年肆志林泉日與二三耆舊觴詠自適自號秀峰  
布衣卒年七十

其質孫夢麟撰譜

楊正東 遵義人萬曆時楊應龍阻兵淫虐正東糾  
被害者赴京告緝適應龍贖罪歸仇殺奏已者正東

棄家潛逃僅以身免

通志

黎懷仁 布衣宋昌州刺史得叙後播州改流父朝  
邦自四川廣安州來居以詩酒自娛或勸仕辭曰龍  
吟爲陽秋而伏藏其幽之潛育之繁昌教子孫家法  
秩然懷仁少穎異讀詩志古儒者嘗曰在家不可一  
日不以禮法率子弟在國不可一日不以忠貞告同  
寮在鄉黨不可一日不以正直表愚俗在官不可一  
日不守清慎勤三字凡百所爲敬恕而已天啟末水  
藺叛總兵楊通霄駐節遵義造請不出爲畫撫戰守  
三策楊從之距所居里許有禹門禪院中多禪宿懷

仁每問往與話詩文未嘗及宗門一字臨終詩有句  
云半學朱元晦其自論甚確弟懷義懷智懷義諸生  
性脫略以明末多故溷跡漁樵自號今剩人嘗醉歌  
曰功名不值一杯水富貴於我如浮雲臨終彈琴一  
曲遂卒懷智官黃岡知縣明亡薙髮爲僧號策眉時  
丈雪講法禹門因師之後終於廣佛寺葬內江般若  
寺中子民忻愛易於來知德弟子胡生盡得瞿塘之  
傳官廣西河池同知明亡隱於家母劉年九十五卒  
時民忻已七十歲廬於墓側朝夕號慕者數年人稱  
白髮孝子卒後從學者私謚文行先生

家譜

牟奇 事親以孝聞明末寇亂銳志請纓從經略  
楊嗣昌著軍功累官驃騎將軍後閣部王應熊調奇  
提師江漢駐守夜郎所在禁剽略招離散賑饑寒全  
活甚眾夜郎人德之知國步日艱退居鄉里彙歷代  
忠臣殉節錄

鄧旭 歲貢幼負奇才年十二游泮英姿穎發值  
寇僭竊隱居山林屢徵不就矩步前賢誘掖後進並陳  
志

程生雲 崇禎時以拔貢授貴州銅仁令循良聲著  
歷陞監軍副使世亂解組歸隱居深山屢徵不起賑

恤饑寒教育孤幼耆友之聲風於閭里安

述不衰年八十而終著有求志軒集行世陽子崇字

德河中四川解元有紫霞山莊集生雲抱負瑰瑋風

節稜然居城北十餘里韜光兵燹叢集艱危敦行不

怠力成全璧時以詩古文名書法深入北海殘編剩

紙惜皆零盡今惟書大覺寺佛堂楹榜尙存遵義弟

生瑞貢生早卒

曾宗孔字心一遵郡紀事先本豫章人年十二爲諸生

讀論語至古之學者爲已豁然曰格致誠正已事也

修齊治平因之人所以不能者只爲耳目口鼻四肢

自利自私耳若以此任之造化而我不有獨主一誠以立於天地間息息敏息息一便息息誠而明使息息得孔顏樂處豈不快哉功夫以致良知爲主謂人心本自靈明直須克去已私復其本體無纖毫障礙自然誠誠卽是一故以心一爲字經史性理百家諸書靡不探索精研性純孝每父母忌辰必素服危坐揮淚終日自喪祖母後卽不復赴科舉崇禎時次當貢太守屢白之不應族間故曰科舉典試者主之猶近古徵辟遺意貢則隣於自薦矣斯何時而期得祿自養乎陳終身以道學持躬郡人名爲夫子一子庠

生孫四一舉人一副榜一歲貢

禮部紀事

李正華字樸實崇禎間拔貢授南江縣訓導攝縣

政二載賢聲四播即為真擢貴州都勻司理年餘告  
歸居永安里之蕩遊臺教子課孫城市絕跡喜著練  
衣號白衣道人嗜陶詩善飲壽八十卒其自書絕筆  
云數十年來清潔士依稀學得晉陶公秋月寒潭無  
色相飄然委化返虛空子一官雲南州判

遵郡紀事陳

志云桐梓人負奇抱異學問淹博

周世祿

萬曆丙午科武舉官至總兵

陳志

劉綎揭子

言調兵出關應援有云如漢官周世祿現任守備管



黎雅遊擊事係職舊役曾任遼陽大凌河備禦亦知  
敵情況職建南班師時曾以精兵黑老虎阿眷等三  
百付彼可調來應用再令隨帶蠻裝軍兵數百及泥  
頭一帶東元等歸順夷兵挑選三五百並帶其部下  
兵壯或一二千或三千四百務要精選命大河指  
揮李日明同卅星夜前來職迴環心計此一枝兵尤  
堪克敵非漫言也但其人惡動喜靜兼世祿原係播  
人恐懷土重遷乞命彼省撫按嚴責速赴毋得干計  
推托按高平山萬曆四十六年碑題銜有分守黎雅  
遊擊周世祿又崇禎四年碑亦有世祿名題云領兵

援遼遊擊將軍子正參將亦見是碑

袁見龍 萬曆巳酉科武舉 陳劉綬揭子言調兵出

關應援有云有加銜守備袁見龍係余溪

余沙同音地方

人今入威遠衛轄可隨帶本部下漢夷殺手親兵自

備衣甲戰馬或一千或一千五百此一官年方精壯

膂力過人屢科武舉計議熟諳可當一面必不可遺

陳起鸞 潮孫官都司崇禎元年奉調督兵柏楊營

遵義道盧安世以屢抗賊鋒授守備明季貴州按察

使防河道胡以烏江失守賊戮黔民令同本里守備

徐登甲招集義勇護道勦賊弟起鳳官總戎起鳴官

遊擊家譜

黎維祚

陳啟相撰 瀝胆遺事 嗚呼終日不見一好

人不聞一好話空過一生殊爲恨事詎知好人好語

自不無適不我值耳今年九月望日兀坐無聊有客

兒顧登樓語次忽及滇事始末愕然有間旋出而觀

所謂瀝胆公案因相抱哭切齒吳逆恨不得寸磔之

天道恢恢豈不大哉迄於今逆賊以反覆之故伏誅

散骨先帝之目庶幾瞑乎悲夫客姓黎氏名維祚字

名遠江津人幼不肯竟學惟雜技卜算形家等是耽

遭亂轉徙家遵義巳亥會黨猗緬時諸爵鎮將各擁

眾拒守維祚憤惋號泣遍走告以大義皆忻幸各密  
草迎鑾奏付達維祚乃合若干木竅木棖三尺許藏  
其中荷荷檠鐺等物挾術以行時庚子正月廿二日  
也予時寓雞足維祚過訪道其行故心壯而難之一  
宿去自是無從問下落矣至辛丑九月十八日抵孟  
良府謁晉藩李定國述其艱苦及諸勛志晉藩色動  
維祚就破棖出諸奏相示晉藩大義之十月六日給  
以令諭一道中云今皇上入緬勢已危急若能走通  
聲息懋建奇功決不負苦當卽爲若轉奏時駕在阿  
瓦城城左右夾河洪波浩渺相拒五六日程祇聲息

通主臣不得見隨奉勅云皇帝密勅瀝胆將軍黎維  
祚據晉藩奏爾忠肝貫日義胆渾身穿虎豹趨辰極  
烈風勁草殊軫朕懷茲授爾瀝胆將軍督理滇黔楚  
蜀通厲諸勦將士山林隱逸等謹慎固防枕戈以俟  
候晉輦兩藩舉師四路策應旦夕是圖勿遲勿忽十  
月十五日拜受訖並收空旨百道印三顆造複底小  
舟密藏之木刊諸神像擊小鉦鑼寫唱以行晉藩大  
喜以旌甲擁至通界始改裝返報諸營冬十一月復  
入緬復命比至騰越而緬夷已送駕出矣時益孟艮  
夷謀亂事洩晉藩怒屠之量不可居乃馳約輦藩白

文選共攻阿瓦阿瓦木城七重已破其三夷曰汝不  
過欲見乃皇帝耳幾年和好一朝背棄何益姑止攻  
三日當送出否則我亦有變計一任汝爲不得已從  
之閱二日右河船密如木葉內外夾攻兩藩覆沒幾  
盡自是兩藩分散晉徙他夷所鞏謀恢復據騰越馬  
寶與輩素善詣白營遙呼曰我隻身來說好話者諸  
軍勿動遂入相見告以密謀言吳願與白台白遂受  
所給有艾將軍者滿洲人亦懼躍附從相與鑽刀軟  
血會上由別道亦爲緬夷送出居草殿三間白兵環  
其外吳兵又環之維祚至艾導入見上見維祚大哭

維祚泣曰事今至此臣惟疾奔告諸營整兵於要道  
接駕上曰兒子爾可致意十王家等若能救我出我  
只願修行去哽咽不能言手剪御衣一片密寫勅付  
卽行晝夜兼程抵荆侯營謀共於偏橋劫駕復入滇  
偵探駕已崩於壬寅三月矣維祚呼天搶地恨不卽  
剗刃吳逆之胸狴狂遽去不知所終贊曰匹夫慕義  
無窮迺其名卒湮沒不克見稱於世者可勝道哉覽  
維祚事其信矣乎維祚自巳亥迄壬寅四年間身無  
一日得見家足無一日不在路前後三度歷絕域無  
人之境其生死顧足道耶志雖不克竟亦足悲矣

楊朝相

號岐山原蜀內江縣籍其先避亂入播因

家焉明庚申值水藺之變養高林壑子三季希震朋

亡西川爲流寇僭陷而播受害尤毒鋒鏑之會困苦

供億朝相日夕訓子不少休震十三補弟子員有聲

諸生間越二年朝相卒梁佩蘭志朝相苦志詩書賑饑

寒瘞無主僕婢子女咸婚嫁之庭有義方邵人嘉美

陳志

鄒宗孟 字直方明亡方五歲讀書穎悟有大志順

治十五六年間僞永厯授知河西縣永厯亡隱於遵

義南五十里南面水晚號浪霞老人其題已真云斯



圖也遠觀近視之非人也恐心則否及內省之不否也而實欲求乎人人於否不否之間微乎危乎可不慎乎因爲之贊有不爲喜無則可樂於意云何畏惹摸索浮雲蔽空日月難卻面皮塗甚麼指視無從像有著落恐以之反招有覩之忤落魄乃說云相本無相有相非相非相是相大不相相我有我相焉用彼相時年八十二矣可以想其志趣遵義詩錄

正安州

鄭紹業 真州土官嗣子賦性雅淳諸昆弟爭護篆相戕業角巾私第倘佯淮水之上以書畫鳴琴自娛

掘斷所居谷口路僅一線不通車馬足跡不履城

鄭規 真州長官司僕嘉靖間賊困土司規語其

主珪曰主尚乏嗣若罹於賊鋒如世系何願以身代

遂著珪衣冠誑賊賊殺之珪得間道逃免

並陳志

桐梓縣

令狐遠 天性雅淡不慕榮利惟以行義教化族里

獎善斥惡不稍假洪武間貴州督撫聞其賢欲薦以

官不受布衣考終年彌高而德彌劭云

賈志

侯良柱 桐梓人天啟四年以千總援遼有功授參

將後以平奢功由副總兵歷左都督世廕錦衣衛指

揮崇禎間勤王至萬里箐拒賊力戰死

桐梓志通志略同

明

史本傳良柱字朝石永寧衛人天啟初累官四川副總兵討奢崇明父子復遵義城又與參議趙邦清招降奢寅黨安鑾六年五月代李維新爲四川總兵官鎮永寧時崇明敗奔水西與安邦彥合貴州兵數討不克崇禎二年總督朱燮元遣貴州總兵許成名復赤水衛崇明邦彥以十萬餘眾來爭成名還永寧賊追之銳甚良柱偕監軍副使劉可訓出戰小卻成名等來援賊乃據五峰山桃紅壩越數日良柱乘賊不備與副將鄧玘等侵早霧迫之賊大潰成名聞山上

呼噪聲亦出賊奔鴟項嶺徑長而狹人馬不能容良  
桂玘軍至賊復大敗死者數萬人崇明邦彥與邦彥  
黨僞都督莫德並授首俘其黨楊作等數千人積年  
巨寇平時稱西南奇捷四川巡撫張論上其功不及  
黔將成名等怒言邦彥德乃已部將趙國璽所斬且  
崇明猶未死燮元信之奏於朝兵部不能決賞久不  
行御史孫徵蘭言訊俘囚阿癡楊作等咸云邦彥卽  
時授首灼然非黔兵力帝卽命獻俘告廟傳首九邊  
川中撫按及御史毛羽健皆訟良桂可訓功詆燮元  
燮元疏辯且求去賞遂格不行良桂怨燮元不爲用

至與相訐奏解職候勘久之御史劉宗祥列上功狀  
七年八月始錄前功進良桂左都督世廕錦衣指揮  
僉事成名等亦優敘未幾復爲四川總兵官八年夏  
總督洪承疇大舉討賊令良桂扼賊入川路戰鳳縣  
三江口斬首三百七十有奇明年冬賊犯漢中瑞王  
遣使乞師良桂督兵援與他將同卻賊十年四月川  
中地震者七地鳴者一占主兵賊果入犯陷南江通  
江帝切責良桂及巡撫王維章時良桂駐廣元盡召  
諸地兵九千有奇分防扼險止餘二千人賊知其勢  
弱五月復寇川北維章告急於朝會賊轉掠他所良

柱乃撤還守隘兵專守廣元維章以爲非計上章言之十月李自成過天星混天星等陷寧羌分三路入寇良柱急拒戰於綿州眾寡不敵陣亡賊直逼成都維章方守保寧反在外連失三十餘州縣帝大怒命逮二人下詔獄猶未知良柱死獄成維章遣戍追奪良柱官十三年良柱子指揮天錫伏闕言臣與賊不共戴天願捐貲繕甲選募勁旅及臣父舊將自當一隊與賊血戰下雪父恥上報國恩帝深嘉之命授遊擊赴嗣昌軍立功已嗣昌言天錫所將親丁二百六十人及召募精卒五六百人皆剽悍敢戰帝益嘉之

再贈一秩殉節諸臣錄云乾隆四十一年

賜良桂諡忠烈

按良桂史云永寧人桐梓志云桐梓人當由永寧徙居桐梓官籍書原處也今桐梓尙有其故宅衣冠存焉陳志及四川貴州兩通志總兵題名又皆云遵義人舉府而略縣也桐梓志及貴州通志名宦良桂作梁桂乃志誤高巖山碑有良桂題名與史合今改從史

傅爾才 崇禎歲貢官湖廣會同知縣多惠政邑人號曰慈母爲立去思碑

賈志

張其綱 崇禎丙子拔貢授貴州印江知縣尋以世亂棄官歸教授鄉里言動必以禮法年八十三一日沐浴衣冠而坐書曰神昏繼書曰神散卒書曰神去閣筆而逝

賈志

傅爾訥 崇禎歲貢官貴州鎮遠知縣尋歸授徒年七十三爲自贊曰明有逸民名曰爾訥雖仕舞溪彭澤不足歸休乎家詩書自淑付與兒曹怡然以沒書畢閣筆遂逝著有春秋講義

金玉振 選貢才震一郡重厚少言不輕取與因亂不仕訓子孫以孝義誨生徒以端方著戒後集人舉



法之

黃以素 選貢於人少所許可下帷不仕惜奪其年

並邱志

藍鳳 由蔭生從四川巡撫徐元泰總兵李應祥

征松番有功補守備嗣征建昌邛州前後克七十六

寨擒巨賊三十九人俘斬萬七千餘級陞漢中都司

川北營遊擊調珍州營遊擊萬厯二十八年從李化

龍討平楊氏授遵義協鎮總兵官卒諡襄武

家譜

李天植 萬厯恩貢中副榜由校官陞貴州新貴知

縣平越同知官至新鎮道有青天之目黔人祠祀之

賈志

傅元和 萬曆辛酉拔貢甲子副榜任廣西桂平知縣陞雲南雲州知州四川敘馬瀘永兵備道雲南按察使兼理布政使賈志令桂平時教士愛民振興學校賦役均平邑人祠祀

傅元勛 庠生天啟間因奢賊破城慷慨從戎設計破賊上嘉其功授三團營副總兵並通志

李長榮 邑武生天啟間奢賊陷城從戎破賊有功授參將

胡賓夏 天啟拔貢崇禎庚午副榜督學使涂列

之蜀十才子內累官至布政司

並賈志

婁朝臣

原籍桐梓遷居南川崇禎十三年中武鄉

試募義兵平賊功多劄付守備又以都司簽書體統

行事尋遇賊害

南川縣志

覃白重

貢生好學不仕與傅爾訥同著春秋講義

覃森

貢生當吳逆亂授以偽職不受

新採

綏陽縣

金甌卜

邑孝廉

縣志

善屬文更長風雅隱居不仕守

道甘貧高軒屢顧不獲一見人擬之爲陶靖節

陳志

周文郁

天啟間名馳蜀中屢試弗售絕意進取究

心經史恬退自守不入城市年八十卒祀鄉賢縣志

梁大元 字永和天啟三年任都指揮崇禎元年奉

命征東有功二年特用撫治鄖陽都御史新

孫

周士貴 字克生邑明經隱居不仕博極羣書教授

生徒邑人士多出其門縣志

志

徐尚選 邑明經甲申之變絕意仕進當路賢之同上

仁懷縣

魏金定 樸茂守禮不入市肆恂恂如也年九十餘

尤自檢飭鄉人稱之陳志

志

袁 鏊 以隨征楊應龍功官遊擊詳土官傳

任曜

字秀峰先世自休寧遞遷屠仁懷唐村曜

生直明季棄書入軍伍累功至陝西長茅隘游擊封

武翼將軍賊王嘉允之亂與大小數十戰時居民逃

竄有孝廉某爲卒伍所俘供廝養曜廉而哀之遇以

禮資遣歸念時事不可爲棄官去家居閱數年後向

所遣孝廉令仁懷下車卽訪曜於唐村爲建轅門二

刻圖記一屬以治中一切詞訟見圖記輒註銷固辭

不許篋而藏之終未嘗發也初在陝士卒嘗獲一幼

女其族屬遭賊屠無所歸攜至家撫育之具奩遣嫁

如已出

朱佩蓮撰家譜

吳省欽任氏述德詩云氏任之先曰

馱嵐姓歙州三徙黔陬載競緬投筆踪隸秉麾柄銅  
馬嘶長蒼鵠飛迸百戰身存一區賊靖有士在纍有  
女在遠各以禮蓄豈非德盛歸歟掩關時際革命

按劉綎揭言調兵出關應援于播人周世祿沙溪  
袁見龍外有云其細開千總朱恩等或一可當十  
二可當百皆能殊死戰馬步俱優且係閒散見居  
遵義仁懷赤水敘南建武等處第恐彼處撫按藉  
口地方有事不得空虛不允遣發歸藉憲諭督促  
之後總序云守備袁見龍雷安民劉芳千總朱恩  
周上元丁福王尙明謝天恩何逢趙璽羅廷賓百

總書倭祥何蔣羅洪羅國臣穆煜王立張童李表  
等經稱十九人以尙明爲其舊將例之必皆播人  
助經平播者在今日惟世祿見龍尙明略見他記  
載然皆不能詳矣摘錄經揭使來者猶知姓字焉

遵義府志卷三十四

列傳二

國朝

遵義縣

周達

郡廩生紹濂溪太極之學順治四年任本

府儒學訓導世亂遁跡山林涵茹道德年七十三終

著有聲教集

陳志

董子策

字獻之號醇夫康熙癸卯舉人三歲喪母

父蘭繼娶陳氏婦駱駱之改醮攜四子來子策事父

及繼母至孝教陳氏子奇策成諸生繼母之喪哀毀



盡禮遭吳逆叛不受僞職年六十一卒

墓志略

平生有

典有則後學尊禮之不敢犯嗜古學有公撰文字稿

多屬之時有道德文章之譽

遵郡紀事

何天章

字亭也諸生內江籍避亂遷遵性剛直深

明春秋周易事母孝吳逆之亂僞將擄男婦三百餘

人天章挺身營救僞將感其義悉釋之年七十終

通志

年

川志作七十一

性嗜古地方有興革要務力成之爲兩庠

領袖請設縣學自天章始嘗遊仁江爲人屬文逐妖

妖遠去

遵郡紀事

乾隆五十二年入祀鄉賢祠

墓志略

武乃文

字子斌平孝子以貢生承蔭襲知湖南綏

寧縣調任辰溪益陽等縣擢辰州府同知所莅皆著  
美績康熙十九年告歸

家譜

談遠字行自亮長子孝友剛介訓家有法弟述

嘗病劇每夜跪階下虔祝若一子未成立願以身代  
弟廖聞之扶杖拜曰不謂白首兄恤我猶襁褓也相  
嚮而哭感惻旁人七試鄉闈不中遂絕意功名構一  
草堂面山倚石雜植花卉課兒子讀書與陳名世羅  
兆牲陰綏九諸名宿相往來每花朝月夕呼狂覓隱  
嘯傲花蹊柳塢之下琴觴告罷繼以詠歌月光墜林  
始各歸去嘗送兒入郡試同人邀遊桃源山郡守胡

期恆騶輿突至眾皆趨迎遠踰牆避之曰我何為道  
旁拱立也居鄉好施與見循分自愛者雖傭夫亦同  
飲食惟恐不入門惡人道值之不領踵門不見人亦  
多以此愧改葬之日白首執紼者數百人狀行

朱永九 由郡庠登仕路歷任滇黔楚粵四郡解組

歸家南里福祿水飛雲庵記

按永九于康熙甲子書喻忠墓碑銜稱中憲大夫

原任廣西慶遠府知府與飛雲庵記銜同則永九

以慶遠知府致仕也墓在錦屏山與喻忠墓接近

王任弼 字肖巖其賓孫母何氏載列女貞烈傳任

弼果敢有智略避流寇往成都道出夜郎箐匿月餘  
一日於巖穴中得小匣啟視則四書集註遂就箐中  
尋繹都明其義至成都以時方用武折節從戎積功  
授敘州長寧營千總與長寧令見撫軍令陝人氣粗  
甚撫軍謂縣令何如千總文雅遂以兩任對調在任  
當蹂躪之餘盡力撫輯士民建有去思碑告歸後優  
遊林下二十餘年始卒譜弟夢悅爲遵義鎮領兵官  
楊愷字仁遠本姓吳父元宗湖南城步人以前  
明四川副將陞提督鎮守保寧時張獻忠入川保寧  
所屬俱成赤地元宗力守城與賊角賊設伏誘元宗

出戰故敗使窮追及旋城已破賊枷其妻蒲置城上示之元宗觸城死蒲亦撲枷墜死城下愷時年七歲兩姊能力刺猛虎偕以逃

大兵旋復保寧有軍官楊文任見愷據屋上擲瓦擊賊詢知爲舊識子遂撫而子之後文任沒于遵義總兵任愷遂家焉愷生有異質食兼數十人力可舉三十鈞工射彈能中奔馬蹄心幼習舉業以康熙壬子武進士授鞏昌副將會三次護餉入都時响馬賊盛望風氣沮旋告歸嗣有事雲南復起爲大理協副將旋調征交趾沒于軍

昭義將軍

繼孫夢華

今永安里萬天宮梁木及丈二石

相傳爲愷獨力持至云子嚳從父出征亦死交趾

張來楨

字詔伯明遵義總兵桂枝曾孫襲總兵潮

孫父以鼎革失職遂家遵義來楨貌魁梧負偉略有

友在雲南吳三桂所往投之吳喜其才授武定府經

厯解餉至陝因遷鞏昌府經歷旋陞通判

墓碑時滇黔

變作軍興旁午河西之民飛輓濟軍力疲財竭來楨

調停轉輸不事督責任民自便民皆踴躍復半歲不

雨米價騰貴時疫遍牛畜人尸積於野來楨勸民出

粟不抑價不禁販赤日行塵中爲民祈澤施藥以拯

之時儼以禳之雨足禱消全活者眾以功授鞏昌府

分理西寧茶馬倉場道撫商招番各得其道

蒙天顏撰德政

碑內轉大理寺卿旋授光祿寺卿卒當官陝時聞遵

義追呼歲欠甚急所居天旺里七八二甲戶糧皆代

納焉今猶存道其德者弟來選官雲南祿豐知縣

家譜

李官蓮字清逸康熙間官雲南軍糧通判封奉政

大夫今德政碑尚存署內

家譜

羅兆珪字鹿遊歲貢父以忠黃岡人明知永平府

鼎革隱居遵義之龍坪時陳啟相隱名掌臺山兆珪

因從之遊無書不窺根柢磅礴負經濟思用于世卒

不合飽經亂離才益橫放常客諸侯間意偶有拂卽  
使酒罵坐聲振杯盤雖王公大人當前弗顧也客滇  
時狎一妓主人豪貴者強奪去一日與宴大賓滿堂  
酒酣奮髯抵几指主人曰灌夫謂程不識不值一錢  
吾乃今見之時王聖甫在座莫逆交也爲婉調罷席  
明日與聖甫水調歌頭拂袖而行著有明日悔覆瓿  
北上問石諸集沉雄鬱挫揮洒自如當其興會颺發  
劇杜陵之壁壘笑信陽之客氣若使旗鼓中原與朱  
王數子上下馳騁未知誰拔趙幟遵義詩人之冠冕  
也爲文雄峭不規規前人詞亦入蘇辛之室康熙壬



午七月卒年六十餘子黃雲字大田中康熙丁酉鄉  
試知江西吉水縣繼宰峽江因事罷歸李專題鹿遊  
集云筆頭獨走江山氣海內誰登庾鮑堂贈大田歸  
里云爲問風流誰得似菊松三徑蔣元卿並實錄也

遵義  
詩鈔

羅士柏 字萊翁始祖榮父萬彥士柏幼穎異七歲  
爲文卽爲鄉先生所刮目十二補博士弟子員康熙  
己酉舉於鄉會試不第因吳逆變南北道梗遂絕意  
進取逆平赴選補日照令以卓薦遷刑部山西清吏  
司主事三年請假歸遂家居不出其荏日照也適遭

荒歉請賑請蠲多方募糴民得無餒四方流民活而  
返者以數千計次年仍旱聞百里有龍湫齋潔往投  
鐵篆甘霖立沛後屢禱皆應不必龍湫亦應王度昭  
曰昔人稱隨車雨如羅公則隨步雨也邑地瘠民貧  
魚鹽而外磽确不毛之地種榭養蠶爲餬口資藩檄  
下欲稅之亟赴轅力爭乃免性好整飭凡文廟城池  
書院有所傾頽必捐修乃已率多以此受累紳士知  
其然謂曰日照牆倒可以日照土築此等事照糧派  
之足了何必若此曰所言未嘗不是然恐以此累民  
故不爲也每公餘輒詣書院與諸生講論又于署旁

築室招士子會課其中爲第其甲乙後成進士五人  
領鄉薦十一人人稱盛事性仁慈責平民不過五板  
民以羅五板目之耿三者盜魁也聞廉名頗斂迹署  
旁有安姓巨富三糾竊之誤人署因竊官物後餘盜  
皆獲獨三逃以此受處分一日三至縣宣言曰我非  
竊官緣竊安姓誤入署耳知官三限滿不肯以此累  
官故來其縛我去解省上官疑縣賈替三曰若疑我  
我手段具在也言畢脫刑具飛簷而去官大駭旣復  
下曰我本良民緣多病爲盜遂無病以不能改行然  
此次累官不小願受刑其得民也如此曩鄰境嘗苦

蝗去日照止數武而蝗不入李應薦曰斯以知三異之美中牟令不得專美于前矣士柏長不滿六尺微髭雅好讀書貫串古今雖專門有不逮臨事精練尤所難及計居官十餘年自比部歸家無長物惟餘書甲乙丙丁四部謂人曰吾以此貽子孫足矣卒年八十有三

傳之奕  
撰傳

唐廉字介石祖以上居涪父一元孝義載蜀志

張獻忠之陷重慶也避走家遵義是生廉廉性溫毅嗜讀書沒身一卷不去手自三四歲時母杜口授論語孝經卽成誦長益自力不漁獵文句間思以所學

實見行事沈沈然人莫測也康熙壬子舉鄉試王士  
正爲座主甚重之明年試春官不第歸教子城北龍  
山有聲吳三桂以雲南畔遣以僞職召時一統未久  
賊焰猖熾幾據半天下人人思攀附以爲真主廉不  
應或有以利害脅者叱曰賊耳受國厚恩不思報又  
反行壅粉矣如廉何杜門八年卒無害辛酉雲南平  
權永寧衛教授後截取知湖南鄱縣海內方量田平  
賦役鄱前宰力奉事圖遷實陰索民財不與則虛丈  
尺增額民苦之廉皆毀以陳乃仍舊刻所訂毛詩正  
韻進士民一一給之使咸知向學年餘以母憂去鄱

皆稱唐菩薩云服闋授山西陽曲令至以邑附省繁劇首除民害民氣以靜暇卽昇人郵諭父老以力田孝弟互敦勉於四門設義學教邑之貧子弟以時資之月一試以文之佳惡考其惰否陽曲大化爲養濟院居貧嫗其中令民間生男女不能自活者與之養稽其數月支以衣食長成仍令其父母歸之八十二都無棄幼河西田自古渡口距烈石近六十里皆瀕汾水歲泛濫壞且盡居民無絲毫獲而稅不已廉屢請免陳得盡免秋征自正賦外舊耗取三之一悉人已廉曰民代天子耕出租賦供天子官代天子收租賦

自有祿若於民乎取則祿也何與他人吮舐上官文  
繡其妻子奴僕者須此吾不須也盡除之民間歲罷  
出二十餘萬兩農用益裕逾年緣事降免士民笮巡  
撫上奏請畱復視事戊寅噶爾丹不靖廉于青黑格  
達諸驛侍儲軍需一草粟不擾于下及凱旋民負鋤  
倚道觀望而已省城災百官督救火廉獨跪汙泥中  
祝曰某爲首邑政不善致天災乞燼某身全民巨萬  
財有頃風愈烈煙塞天地百官走逃命一侍者促曰  
勢迫矣請逃廉屹不動忽反風火滅乃起鄭珍撰傳前後  
泣任凡七年性儉樸衣布衣不曲事上官歲時儀節

胥絕接紳士以禮而請託則堅拒弗許民以事至引

至堂前語讟讟不厭而歛法者按治不稍貸馭吏嚴

而有恩解組時敝車羸馬行李蕭然人皆謂適符其

名云

山西通志  
名宦傳

卒年七十九廉至孝兩割股療親

母在鄙頗思歸卽解官乞終養行有日而母卒校刻

五經四書正字學者宗之著有龍山文稿子義伯義

仲義叔義季義伯宰陽江時一老叟忽詣縣稱謝恩

者莫識其故細詢乃知其人舊以田廬爲豪據控不

白因貧走外至鄙里胥疑而縛送縣廉令檢之得諸

舊控紙移陽江白其寃資令歸果得直其人飲食必



祝至此蓋數十年家譜道光十八年題入祀鄉賢祠冊檔

楊希震 字東翁朝相子康熙壬子舉人父卒時播

川尙多難震皇皇焉奉母何猶鵲鳩之集於茗華而

懼其折也母進震勗之曰汝家世簪紱蟬嫣今雖丁

喪亂忍使門祚衰薄耶震飲泣受教舉於鄉比就試

春官歸滇黔江蜀播脣齒漸次蹂躪震奉母隱山中

母旋逝震從山中治翼車踉蹌昇櫬歸所居里許之

北原合葬梁佩蘭撰朝相墓誌後選授廣東吳川知縣縣自海

孽內訌虔劉而後戶口耗半野有石田道多輿草希

震蒞事卽單騎自郭而郊同諸父老指示畦畝一一

籍其戶主名狀爲飛詳請蠲其地之未墾者不徵其  
稅當徵者爲約法分限令源源輸將不致窘絀禁火  
耗革淋尖除內辦免差徭捐薪俸以固城垣嚴保甲  
以弭竊盜公餘進諸生商障海廻瀾之事所居竹屋  
數椽僅蔽風雨傳厨無所飾輶車無所入殘疆瘡疾  
起登衽席人咸頌不愧清白吏子孫鄭際泰撰壽序梁佩蘭  
誌希震父墓謂在史館時震謁選京師往相見與語  
率根本聖賢垂條布葉已知爲用世才迨抵任覩邑  
凋瘵爲招集流亡勸歸田里勘荒繪請得免積逋往  
昔叢弊胥與梳剔凡關民瘼靡弗上陳云

唐義伯 字爵三廉長子以拔貢任四川廣元縣教諭鄂爾泰薦義伯作人有法授廣東陽江知縣縣有平民八人爲豪家仇陷已擬重辟義伯至廉得其情上白之當事持初讞甚堅義伯爭益力卒獲昭雪實心爲政類如此雍正元年以父母老告歸盡養十年遂不復出子惟安宰涇縣時手書居官八法致戒一接待紳士宜厚禮有請託則直言拒之一審事堂規宜肅細心求情勿許書役傳話多言致是非顛倒一准理詞訟前後批不得舛背一用人有生事撞騙者卽行驅逐一漕米倉穀勿用非其人通同作弊一謁

見上官當言則言有疑難當虛心請示一接見同寅  
擇善而從不臧者勿濫交失言一驗尸傷勿盡聽作  
作所報當親目細驗乃定案情義伯爲人慈祥仁厚  
與弟義仲義叔義季至老相愛猶幼時年八十七歲  
卒長子惟欽字若昊以拔貢官普定教諭家傳

李先立 字卓庵號筆峯學者稱北山先生康熙甲  
戌進士世居四川江津縣父倫然明末避亂家於遵  
生先立幼與羣兒嬉戲卽端慤異常洎長凡前指嘉  
言懿行必身體力行之始居城西桃溪原吳逆叛因  
避兵居平水里筆峯山下授生徒母早卒得脩脯悉

奉之父常著一粗布袍日兩粥飯冬寒乏火惟繞室  
趨使發熱或簍糠粃置足其中否取竹一節足輪轉  
使忘寒然學愈篤觀書必一字一句自信方已有相  
者謂僅一貢而勤如此友朋或苦之先立曰讀書原  
分內事且吾輩捨此又將何求爲

國朝遵郡開科進士重慶總兵鄭僑桂聘爲師倫然命  
往先立曰倖得承歡雖千金不以一日易也旋倫然  
沒殯葬悉遵朱子不作佛道事庚辰選宰直隸之新  
安布衣疏食如秀才時新安多巨盜前令以緝捕不  
力去蒞事不一月擒數十人置首於法又獲一首卽

以爲捕頭盜因盡得每讞定泣謂曰奈何不作好人國法不能爾恕也盜多感化患以息民苦雜徭久悉除之胥役紛告諸費或可蠲上官餽勢難省先立召四鄉父老至與約自今餽送上官舊例難裁者共計費若干爾百姓計糧均派自封自送咸歡呼如命上官知如此各不受餽送私派遂止邑境半水鄉近隄田廬常被水

仁廟幸臨發帑修治命先立董隄役數月而成民安畋宅又仿朱子社倉法建之各鄉令公舉一德望服人者領之二廉幹公平者爲副村爲一冊會之鄉鄉爲一冊

會之官上下相維歲一斂散約法嚴鎖鑰謹蓋藏定  
斗斛稽丁口時斂散清出入禁代借明賞罰凡八條  
先立每聽訟如家人對語嘗謂人曰官體森嚴已足  
懾人心志若再加威小民有情亦何能條縷也當刑  
者情喻理折使之心服然後使就刑笞多至十而已  
百姓咸不忍少欺或經月始一受民詞公暇卽與士  
子課文以道德相規勸倡建學宮以二丁祭舊派各  
行供應褻慢非禮發歲帑自備務豐潔邑多業漁載  
冊漁船三千有奇舊撥四船奉公五日一易至是捐  
俸造兩船歲募水手四應役著爲例遵義舊無考棚

試者就重慶每試非寒卽暑千里往還多致斃者甲申先立呈請設棚奏

閻余允又遵義於全蜀獨有場稅鬻子賣產賠累不堪明年先立又具呈請免部以遵義場稅從無缺額無庸議明年二月

仁廟幸新安一日微行詢民疾苦及有司得失僉稱先立不打人不要錢

上頷之四月調署曲陽縣每語吏胥里民諺云署印如打劫以鑽營求攝必取償百姓耳余攝此非有所營爾等胸中毋設若意各守爾法治爾生半載民歌曰曲陽



城降福星真父母兮又神明催科緩兮火耗輕積弊  
除兮遂我生旋奉

旨行取入吏部將行悉以俸餘分諸弟前買僮僕四人俱還  
其身契厚遣之至補文選清吏司主事郡人入部蓋  
亦自先立始戊子湖廣某營以擅征紅苗奉

旨吏兵刑三部會審兵刑二審者擬概戮出師等官先立爭  
曰上官行文屬員不得不奉行之今厚責屬員若此  
枉甚余不敢徇也遂活副將參守官四人操政一年  
人稱清簡是冬請假歸年五十二歸顏其軒曰論真  
居曰守拙日與從遊者講求理道嘗謂我輩讀書於

義利關頭更須著力十餘年未一人城有請者輒以足疾辭鄉人當春夏交多乏食因會四十餘家勸設義倉于各村復會村人相約曰自今吾鄉中事無大小憑公論理屈者罰不遵門訟者絕之凡宴會概不與往來每會飲輒申勸戒惡氣遂息以義倉力不協因與四子酌爲家倉約今歲各出穀四石貯別園擇最急者貸石息二斗視歲豐凶遞減之可權損倍稱之累積數年即可漸推及遠曰人苟存心利物不必在大行以勉強守以至誠必有一二濟夏旱有議致巫禱雨者先立曰正青黃不接誰復供給此輩且募

數日拜禱又數日卽得雨苗稿矣盍辦香筆峯祠下同聲悔過庶合禮眾從之禮畢雨如注自是旱如此輒應已亥清明自卜壙宅右召比鄰父老子弟酣飲終日次治身後事編喪禮儀節付其子曰初終痛切事宜何暇詳按此可無後悔重九前一日策杖緩步高吟舊作九日詩入夜端坐而沒年六十二著有北山詩文集子翔翰翔貢生官婺川訓導孫涵侯曾孫懋思皆舉人

詩

羅大昌 諸生郡一州四縣試者始附夔州棚繼附重慶棚士非素饒不能赴試大昌乃自捐數百金倡

首請設棚遵義隨又北上呈部懇奏其詞謂上不累  
官下不累民學政臨遵一切費用皆生童公捐云云  
部議是之由是行文四川科歲考學使並就遵棚大  
昌之力也

公舉事實

李孟生 字景文縣庠生其先諱復貞者明成化間  
進士仕至亞中大夫由蜀遷播孟生言笑不苟篤志  
於學不事家人生產教授遵黔間俊秀多出其門年  
九十卒著有學庸講義

家譜

李專 字知山號白雲居士歲貢本四川江津人  
父宦滇性孤鯁順治丙申監紀正兵營時寄孥黃平

州署生專後陷於吳逆之變滇平爲大吏不喜罷官  
旋卒家貧甚專因寓家黔西敝裘羸馬四出求食所  
至與諸名流豪歌痛飲幾忘其身任在天地之內曾獨  
遊薛濤井貴遊子弟方裙屐賦詩專野服屈其中口  
占一篇滿引三觴不通姓名遂去咸驚爲神仙中人  
自少至老遍歷滇黔巴蜀楚越燕趙之郊備嘗輶軒  
晚而益窮至賣書供饘粥凡其胸中悲喜抑鬱一寄  
之于詩其詩豪宕不羈獨抒性情如白雲在空自舒  
自卷飄忽幻化豪不任力清放得之東坡雋永近于  
誠齋視鋪排餽釘者夷然不屑也黔撫常安敘其白

雲詩集十卷行于時巴縣劉康成慈簡傲不可一世  
專與爲莫逆晚更交崇寧蔡雪南修來自謂平生得  
此二友嘗教讀滇督署咎其學子督有違言卽日襍  
被出督具脩金謝之專擲而去其品概如此晚移家  
遵義查郎阿張廣泗修四川貴州通志專皆與纂輯  
卒年八十餘詩遵義鈔錦里新編專少以詩自豪放蕩不  
羈有贈湘潭進士劉曄續娶詩云不用將縑來比素  
須知有鳳必求凰人多傳誦又弔驢云茹草何曾耗  
秫田主人情薄尙加鞭化爲鳥道一杯土愁對蠶叢  
萬壑烟野店斜陽山下路小橋流水雪中天祗今行

役將誰恃懶向孤村問釣船又昭君村云空船峽裡  
近花晨一綫天低不見春肯信山川如此險鍾爲窈  
窕竟無倫紅顏兔穎描難肖青塚龍沙怨未伸世代  
屢移遺跡在琵琶休撥暮江濱皆雋永可詠四川通  
志專學問淹博移家遵義終老渝中

劉荻一名羽荻字忠嗣隱居博學詩文爲時碩

所重其稿今盡亡

遵義詩鈔

有題陳世長舫齋云想到虛

舟百事慵當窗端只愛雲峯目隨鳥背思無際身遠  
龍濤夢亦濃海上鷗羣終踐約江潭漁父數相從乘  
風孰與臥遊好消息還當問二宗

蜀雅

羅雲師 本名其昭明貢生冕次子康熙己卯舉人

官四川涪州學正課士有法科甲多出其門

家譜

羅其昌 榜名其貞字復仙號裕庵冕三子康熙丙

戌進士授河南鄆城知縣士民爲頌實政十二條所

設義學名羅公書院庚子咨補驗封司主事陞稽勳

司員外郎壬寅授御史雍正元年巡視北城兼掌山

東道監察御史

召至景山

賜墨硯尋以巡查圖嗣海並夸蘭大等山西運米事迹有功

還京爲癸卯科



殿試監察御史是日陞光祿寺少卿甲辰充河南鄉試  
正考官歷陞通政司右通政司同九卿奏事兼理光  
祿寺少卿事

御書福字賜之旋署順天府丞陞光祿寺正卿轉大理寺

御書福字于石及魏徵上唐太宗十思疏一則賜之其昌居

官懃直清慎一私不可干後謝病歸日居靜室講濂

洛主靜之學著有北遊咄咄草冀北小草湘江應酬

草湘江筆餘宦遊偶吟草兄其章歲貢官四川富順

訓導子彌敬雍正甲辰舉人官陝西麟遊知縣

縣碑

杜思賢字猶蘭號肖齋康熙辛卯舉人揀選雲南

知縣初署路南永平補授廣通循良績著旋知霑益  
州擢蒙化府知府在霑勤求利病勸農桑謹訟獄修  
城郭學宮設養濟院經蒙館百廢具舉實惠及民民  
頌之曰公德惟宏愷悌由中藹若春日厚若喬松孝  
能錫類忠厯民恫南陽杜母綽有宗風公政所嘉被  
澤靡涯吏不舞法民安其家雉依于轂鶴馴于徭訟  
庭有瑞九月梨花公教惟殷誨我諸生簡茲俊髦曲  
示裁成言提其耳言削其文西平桃李亭柳青青公  
思無斁時來頻璧培我士風奎閣是立煥乎東南文  
光赫奕龍門鳳池恩波罔極云云

霑益遺  
愛碑

唐惟明 字視遠號闇亭義伯次子雍正癸卯舉人  
選授山東觀城知縣調繁荷澤告終養歸後知河南  
永寧縣有秦瞎子者與某婦奸婦毒斃其夫瞎子不  
知也前任俱論謀殺案屢反不能定惟明鎖二人於  
城隍廟柱夜竊聽之盡得實情邑稱爲唐青天惟明  
性恬靜甘淡泊所至以廉勤聞于鋪歲貢鋪子源澤  
能文乾隆甲午舉人

案傳

周毓元 字大乾號柏林道周子七歲解作文雍正  
甲辰進士揀發河工効力署河南嵩縣方百日士民  
悅之不合上官因事解任歸未幾沒爲人篤孝友尙

風節惜不永年著有柏林詩草避義詩鈔

談宣字師陸遠子雍正甲辰舉人選知陝西洵

縣因事左遷歷署四川眉州墊江建水終永寧府經

厯宣羅兆牲壻為詩文得其傳著有拾遺集巴塘雜

紀通義詩鈔

唐惟安字汝止號敬亭義伯三子生九月母武沒

庶母蕭撫成之長天姿敏悟至性過人庶母教之甚

于嚴父惟安亦尺寸無敢違年十八中雍正丙午鄉

試以大挑授江南涇縣尋調知歙縣任三載清慎自

充丁卯同考官所得多知名士年四十為庶母告

終養歸依戀不殊兒時蕭性嚴如故偶拂意雖愛物  
不碎不已惟安每值如此雖櫓隅竈角必跪而牽衣  
怡聲請息怒或爲兒嬉戲必得蕭歡笑乃已惟安風  
神灑落作詩文和平懇摯如其人寫山水得營邱法  
時仿高氏指意晚暮怡老亭嘯詠其中稱怡老亭主  
人著有敬亭詩文集敬亭詩餘題義鈔子銖乾隆甲午  
舉人


莊佳雨

字岱南本福建漳州平和縣人十三歲時

因與羣兒鬥恐父師責遂逃出至邇依鄉

居南鄉

程姓者遂爲其贅婿中雍壬酉年蜀闈已成進士矣

倍履歷誤稱福建致黜乾隆十四年選授四川溫江知縣陞知忠州以緝獲教匪巨魁馬前子功題陞保寧府告歸至家適上元時家人方祀先見佳雨布衣冠從行數肩行李黃昏入戶不知其已致仕也遵義詩鈔羅彌高字謙六號仰山雲師次子雍正丁未進士授文選清吏司主事已酉鄉試同考官轉稽勳司員外郎兼管陞戶部山西司郎中乾隆已未監試武會試陞江西道監察御史協理陝西山西浙江諸道監察事時遵義糧三千餘雨民苦之彌高疏奏言四川一省明末遭兵燹之變土

民靡有孑遺迨康熙年間卽有遷移川省承業陞科  
不過十分之三全省地糧猶然失額雍正五年冬特  
發京員會同地方官丈量地畝其遵義一府當昔未  
遭兵害首縣條糧一萬二千七百九十一兩零原未  
失額地方官不知一並丈增糧三千二百八兩零地  
不加廣賦日加多民之所獲如故官之誅求無已似  
此增丈于國計未見有補于百姓又何利請行豁免  
其他多所建白有古直臣風治家條教森嚴處鄉族  
一以禮讓兄彌素康熙癸巳舉人官雲南江川知縣  
弟彌元雍正丙午舉人

墓碑

徐錫鬯

字對揚階平子諸生孝友

學九歲能文

著有城山堂詩文稿

嘉興府志

王所師

字蘭林父

禔廩生任弼其祖也母楊希震

女一夕夢一叟抱似貓者與之買叟曰賣畏汝所抱

孩耳次夕抱所師坐楹下笑一物坐於前謂是牛逸

呼奴持燈視乃虎也三號而去次年所師父母俱喪

時甫四歲其伯虐之使牧出則以繩縛牛背所師竊

執四子書讀之稍長益自勵名能文中雍正己酉鄉

試選授直隸大名知縣越二年卒於官以清廉聞著

有蘭林遺稿

家譜



王廷愷 幼失怙事母至孝力能開二十石弓中雍正癸丑武進士家素饒至是悉拊諸弟鄉人以爲難甲寅率鄉兵從勒征以軍功授浙江寧波衛守備善撫練士民感泣送行

一千餘金整葺武備去之

日兵民感泣送行

實

王觀 字賓王號默叟祖運泰喜爲善官黎平府經歷吳逆反棄官歸觀淹貫五經旁及子史晚所學益邃雍正乙卯拔貢學使晏斯盛極重之書經術湛深扁以贈後官修文縣文諭年六十六卒

家譜

鄭瑄 字獻虞益顯四世孫乾隆己未進士以親

老就教職官黃平州學正八年開講堂教授及門著  
稱者如孟侯富盧琦王偉士杜文衡常仕炳李培並  
中甲子丁卯兩科鄉試偉士侯富旋捷南宮州之科  
名於斯爲盛談者艷之晚年告歸居湖陽水上放懷  
林壑文酒相娛著有湖陽集

遵義詩鈔

唐惟克 字岫山義叔子乾隆辛酉舉人主講湘江  
書院八年士多成就時束脩薄惟克常蔬食恬然也  
知府趙光榮議增館穀辭不受後截取揀發福建鹽  
場厯任赤杞石碼惠安等處時私販令至百斤者斬  
惠安私販數百人拒捕惟克隻身詣鹽船以利害諭

之眾投刀伏泣請罪因取販首數十人及鹽至署中  
不卽訊久之鹽化鹵斤減百皆得不死舊俗土庶著  
名家婦女幼寡者兩家父母于通衢結綵樓宴親族  
鼓樂送女樓上縊死謂盡節惟克曰婦女之節豈在  
必死哉是毒風也嚴禁之俗因以變嗣辦臺灣軍務  
有功委署鳳山縣事不就部選安徽虹縣改調湖北  
光化縣郡守頗貪墨故以事與難惟克卽封印請參  
處後觀察仲直之乃出聽事陞武昌同知旋署宜昌  
知府宜昌素苦丁錢復艱食生子多不舉惟克爲免  
丁錢令里正月報生數官給錢以養所活地民每生

祠之以老告歸裝書數十篋而已惟克爲人和而  
介厚而精明在湖北曾充內監試官有以四千金賄  
關節者惟克曰非不愛錢但我子孫亦須讀書應試  
耳歸休後居一室几席無纖塵手一卷常終日時或  
正襟危坐觀蒔花澆竹嘗曰此中正多佳趣但人不  
知領取耳有至問學者任之肆談隨以一二語指點  
之人各有得而去不喜多作文字曰不工不如不作  
也優游林下十餘年年八十卒子錫乾隆丙午舉人

適義  
詩鈔

唐惟被

乾隆辛酉拔貢臨事不苟剛介自持爲施

秉校官倡修 文廟日與諸生說難後將之子錚任諸生厚贐之拒不受居家里黨貧者多賴以活平生手錄書甚多不作一行草字子錚乾隆甲午舉人知廣東南海順德等十餘縣陞知連州直隸州所至愛民如子折獄若神奸宄斂跡時稱能吏

家傳

宦儒章 字含光其先本姓關元時避兵黃州更姓褒音綴後由江津籍播父奇遇補諸生學使以姓不典因更宦儒章生而俊秀天性孝友乾隆壬申進士初知廣西灌陽縣邑西九龍巖有礦可採奸民上呈請開儒章以有名無實且多損民墳力持不可而止調

知崇善縣縣舊有柴馬田例民充派不足襍以婦女  
輪充累民甚至悉除之病麗江書院臨捐俸建崇  
山書院俸滿內補太常寺博士陞吏部考功司主事  
一年出知湖南桂陽州旋署永州府以學宮未協形  
勢率紳民遷建羣頌德政焉在桂陽建鹿峯書院暇  
爲諸生講授文教因大興儒章練達治體所至人稱  
神明而忠懇廉潔毫無矯飾爲文亦根本經術嘗曰  
讀書務得先哲精意身體而力行之年六十三卒  
譚允文 字信菴恩貢忠厚誠樸歲教鄉里嘗令弟  
子市鹽歸稱之浮半斤詢知賣主名卽持出俟主至

還其浮者告弟子曰爲人要當如是勿佔人便宜也

家譜

王以中字敬齋號坤峯從叔所師學乾隆癸酉舉

人以大挑選鎮遠縣教諭陞威寧州學正截取知四  
川筠連縣筠連向編戶輪充里牌應辦公務猾胥追  
呼侵蝕戶下者一輪役卽盡其產民苦之以中力詳  
請除嗣全蜀有此弊者悉禁焉邑文風素不振試童  
僅僅百餘以中捐俸建騰川書院籌置公田備束脩  
膏火復分募修葺文廟以贏餘補禮樂器學校之  
政煥然一新後以凶犯踰限無獲被劾謫新疆在烏

魯木齊六年主教虎峯書院所學益深蕭然自得嘗  
寄書子姪曰讀書體道不可廢也昔蔡元定謫道州  
寓書諸子謂獨行不媿影獨寢不媿衾勿以吾得罪  
而遂墮其志此言可玩耳嘉慶庚申赦還年八十卒  
著有學庸講義文律要津詩法覺來杜陵長律註復  
靜琴譜狀

譚世職 字文齋允文次子父早喪母李教成之乾  
隆甲戌進士官翰林院檢討記名御史以母年七十  
告終養歸主講啟秀書院有年教弟子知行並進不  
爲章句之學務使有體有用以底於成弟子遠近著



籍者數十人母之卒九十六歲時世瞰亦年六十餘遂不復仕卒世瞰恂恂儒者居家親戚來往幾忘其爲詞臣嘗出外爲不知者唾辱他日見之如不識也

兄世暄恩貢

家譜

彭

謚

號靜齋

幼負嗜書嘗夜焚香照讀中乾隆

丙子鄉試後大挑任思南教職截取知江南旌德縣

廉介自持告歸仍茅屋數椽而已

實行

楊朝選

字升尹乾隆庚辰武舉親病曾兩割股救

愈兄遺兩孤貧分已田給之耕常以孝弟耕讀勸鄉

人從之者眾徐準常語人曰龍塘一鄉數十年無訟

獄賭博亦無賭具者鄉人陰受楊君之福也龍塘蓋所居地名年八十卒子體秀嘉慶辛酉副榜選安南訓導孫連奎連漢皆舉人

公舉事實

王恒字久也號咸齋觀孫乾隆乙酉以拔貢舉

於鄉七試禮部不售大挑分發浙江補慶元令調平湖獲海盜有功陞江蘇海門直隸同知又以獲盜功陞金華府知府行至揚州卒恒所治有聲治平湖六年最尤著初下車邑大旱無賴子嘯聚數百人爲盜肆掠鄉巨室且揚言某日入城劫倉與庫獄勢洶洶議會營往弁不敢出壯捕皆色沮恒獨率數役掩其

所擒渠魁悉重懲之周涖四境凡數月乃已時大吏  
聞不靖將率兵來撫因止而疏其能入告邑東四十  
里曰庫港迤南北爲戈溪大乘兩防東通松之泖湖  
西達邑之馬浦舊有橫橋後圯鄉愚取便行人聚土  
爲堰越兩年適旱遠近支河皆涸恆往度形勢亟鑿  
堰建橋復舊制凡通橫橋支流者數百里膏腴之田  
並食水利無旱潦憂恆爲政首重文教培士氣修陸  
清獻祠墓立守祠生奉其祀新陸孝子祠封植龍湫  
山人墓重修常湖書院益膏火義田增設義學捐俸  
延師舉廢幣會勸紳捐田六十畝同時舉葬者二萬

餘又捐築獨山海塘倉署之屬凡有裨政興者百廢

具興論者謂古循吏無以過云卒年五十八

陶澍撰傳

恆

試春官時經鎮遠見同鄉袁州守喻敬彰樞密古寺

中不能歸思舉之無所出及任平湖憶前事即遣三

百金歸葬而喻子尙未知也他義舉多類此

公舉事實

鄧功偉 乾隆乙酉副貢素行端謹友教數十年後

選訓導以老不就子啟成道光甲午

恩賜副榜

公舉事實

張汝璽 字雪齋父鑑諸生先世自大同籍蜀祖璞

仕明御馬監監正甲申之亂徙遵汝璽年八歲誦朱

子章句卽暗曉一日讀鄉黨篇起而曰此篇形容聖人只是一敬字稍長究心六經每嚴冬拭水以沐志想超然後以祿養不遂歲貢當銓教職辭不就年八十猶好覽古史籍爲諸孫講說誦吟不已

羅謙撰墓碑

張汝霖字時若乾隆戊子舉人幼孤事母孝門內

甚修時有品高諸子之譽

家譜

王以純字時熙所師子乾隆戊子舉人判四川西陽州值白蓮教匪圍城家人皆泣以純據椅大叱曰爲國家死城社何懼之有而泣爲竭力固守城賴以全賊平題匪本州旋卒

唐金 字緘之惟安三子乾隆戊子舉人大挑任  
黔西學正蔬水自足日與諸生講誦爲娛嘗曰民社  
非所能也可以此藏拙乎迨兄錫卒于安州任貧極  
嘆曰我不出兄樞必不歸此不能安吾素矣乃就選  
知山西屯留縣卒于官金性不耐俗爲文光黯黯然  
詩宗恬淡翛然自遠書深到晉法分隸存者人爭藏  
之所居圖書四壁焚香掃地終日與古人往來藏祖  
廉所得狄梁公琴一張在黔學時購得朱子自書四  
絕句墨蹟平生寶二物坐臥不去左右可見其性情

云遵義詩鈔

周曰健 字惕齋父自邵廩生曰健中乾隆辛卯鄉試大挑任黔西學正兼主講秀山書院凡十二年士習文風因之不變時

大師勦興義苗有以曰健才薦赴營曰健上平苗策三道悉中機宜興義平大憲擬敘擢辭不就奏加軍功一級旋陞鎮遠教授截取知湖南興寧縣縣敝俗溺女尤甚曰健力禁之數年其風頓息告歸一載卒

家傳

李鳳翽 字丹吾瀛子生倜儻穎異乾隆甲午舉人屢赴禮部不售遂絕意進取以詩書自娛號半山峯人世居遵南鄉地從無講古學者乃肆力詩古文詞

爲之俱後復潛心理學所造益深嘗曰理學文章判  
然兩途古今才士優文藝而短器識由理學少體會  
耳又曰凡聖賢言語皆當體貼於身然後可代聖賢  
立言徒工帖括弋科名陋矣性峭直不肯俯仰隨人  
鄉鄰有鬪者得一言輒解秀寧撰墓志生平每一操觚必  
有關於人心世道嘗與陳懷仁書曰凡讀四子書當  
以集註爲本此是身心性命上功夫若徒博覽古今  
名物故實爲詞賦之助此就末流上用心恐終玩物  
喪志爲有外無內之學年八十一卒著有六書啟蒙  
覺軒雜著讀史論苗爾雅讀杜心解戊巳篇覺軒問



擬家譜

李鳳翽字鶴林孟生孫生一歲父涵死其母張苦守以教鳳翽讀書日數千言爲學亦力弱冠卽中鄉試貌俊偉性尤慷直事關名教卽身任之嘗遇婦扶其夫者下馬鞭之數十復爲導以大義或議之對曰人之多事非爲名卽爲利我多事無爲爲綱常耳庸何傷年未四十卒

諱

張文遂字成章生半歲失怙母饒撫教成立以歲貢選獨山州訓導辭不就事母以孝聞母中鹽病哮喘不能行步凡衣履飲食便溺文遂必身親之晨負

而出慕負而臥如是十餘年因終身惡鹽食惟淡性  
樸厚好施歲荒屢倡捐賑恤族隣貧不能昏葬者必  
代委曲竣事族有借宅其地者久之自賣業而買者  
必并宅地始售因與以成之不取一錢一丐者至門  
給以米不去必求衣文遂內顧無所有卽解其子一  
衣付之其行事類如此爲文謹守純樸邑科名多出  
其門以居鹿鳴山下學者稱鹿鳴先生家譜

張

極

字中立號一峯汝雲子自幼喜親近先生

大人一日讀史其父詰以褒姒喜聞裂帛何也起應

曰其性然也穎敏類如是中乾隆丁酉鄉試大挑補

河南滎陽知縣劉素結匪猾軋城野極獲其罪  
狀置之法闔邑肅然任一年以病歸病起揀發直隸  
署井陘時用兵西方以駟務勞加軍功一級嗣補授  
阜平民如得父母邑報大蝗將往捕其夜聞殷殷如  
雷晨起視則蝗盡出龍泉關外以邑學校廢弛於城  
中及王快鎮葺創書院捐資置章程令諸生肄業尋  
調署平山當滹沱水經處民刮淤種稻約千頃漲後  
田界復爭久不下極冒暑量勘十餘日訟以平又調  
署衡水城外水道舟前令於城門河沿各設柵口隸  
因以索錢商旅苦之極至卽令撤去旋題補大名行

至阜平老幼送者人數千一老嫗隨車哭詢之曰兒  
無賴好博得公至已數年今去老婦不及夕食矣故  
此悲也經衡水民爭先道迎阜平民尙多未去爲留  
一日設酒食諭歸之哭有至失聲者至大名法行令  
肅上官亦見憚呼爲鐵面包公嘗謁見本道門隸坐  
不爲禮極正色曰朝廷令顧不如一隸耶本道杖隸  
以謝時內黃賊張標黨數百人時出劫奪極力言諸  
大吏請急治若緩卽難皆不許惟按察使全保頷之  
乃約民以禦賊法且令曰殺張標及黨者勿坐境內  
稍戢督學第元銘復

命朝廷因知張標嘉慶三年長新店報劫

上諭此案盜賊必張標密令總督嚴捕賊偵知先遁極率民  
役跡盜出沒獲其黨數十人標自殺死極嘗言大名  
刁悍由守令不知綱紀吾所至皆示以整肅訟獄煩  
由士人不知廉恥吾別異其賢者而不貸不肖者故  
治大名五年風俗大變卓異陞開州知州將蒞任有  
狐借馬姓言曰張公來吾去矣以父母均年八十告  
養歸極所慰治多苦瘠而差派力求減曰惜一分民  
受一分之福吾素凜者也又自謂立法期嚴用情期  
恕故所治咸帖服不以爲苛嘗謂源清則流塞官者

書役之本書役者與官其治不正其本雖三木以求  
無益又謂官拘一人賠累者每數十故愛民不如省  
事省事不如無留獄吾官二十年決獄未有遲至一  
日者不敢言無枉民而勤以補拙則所自幸又嘗謂  
吾治事午夜必捫心不愜即終夜不寐民可欺天可  
欺耶居家如書生衣食惟儉雞鳴即冠帶治事焉曰  
人不可一日苟安也喪父母哀毀失明卒年六十一

狀行

楊傳字肖說號夢巖諸生若松子乾隆戊戌成  
進士選授河南內鄉知縣在任六年摘奸懲惡內行

清廉時有楊青天之稱告病卒于寓年五十六官囊如洗僚舊醵錢歸其親傳事繼母以孝聞與兄佐友愛郡新建湘川書院首主講席從遊者十餘人與鄉薦皆得其啟迪云

行狀

李

樾

字蔭侯歲貢生苦心行已介然離俗名所

居曰四一居楹書云天地之正氣忠一點孝一點人世之正途耕一條讀一條銘曰孝求無愧忠期不忤耕勿辭勞讀須尋樂四一居敬不煩贅說著有望雲

草

澧義詩鈔

黎安理

字履泰號靜圃廩生正訓于中乾隆己亥

鄉試以大挑訓導永從選補長山知縣任三年告歸  
安理身長八尺目光如電語聲若洪鐘生而貧少時  
醫卜星相述什一無不業以餘隙讀書六世祖民忻  
受業來知德高弟世講來氏傳故尤精易學說義理  
神逼大樽鍾陵捷可日二十篇繼祖母夏悍妬甚父  
以館於外仍不容因館蜀灌縣卒母亦時被逐居外  
家安理之幼夏乘睡以蟲蝨毒口鼻又誘至溪邊推  
之水並死而救蘇甫十歲卽躬勞役代父事祖父母  
每舂力不舉夏繩繫碓首令挽踏之夜必三眚乃罷  
晝令薪樵或刃傷指幾斷方構思不覺也母夙嬰痼



疾成童後卽講求方書盡力調治因延年四十餘壽  
近七十始沒祖父性古強奉四十年雅得歡心沒後  
營葬髮至爲白夏之死以怪病事之五十年至此已  
亦老尙侍疾數十晝夜無惰色父客死門人葬之灌  
安理屢走灌撫墓痛號觀者泣下夜卽宿塋側告歸  
甫一月卽往置祭田去來數千里忘其老次弟在灌  
逃三弟後亦逃安理鄉舉後出入黔蜀跡次弟卒得  
之季弟終不歸子愚至三年不識一字而撫之如已  
子論者謂其制行當於古孝友傳中求之平生慷慨  
有爲爲人謀必竭力嘗救一從兄出於險墜崖幾死

一友厄遠所呼救夜行困極卽宿荒郊亂塚中不悔  
亦不德也待人必以禮法見者畏焉善誘教弟子至  
鉅者亦有成就去宰長山未三月值曹滑教匪亂邑  
當兵衝軍符絡繹民卒無擾沈詣三者邑賈戶賊平  
都中獲遊民偶戲者刑訊急以篋中有沈鈕扣字號  
遂誣沈謀逆軍機飛檄省密挈沈事極鍛鍊安理力  
白之卒獲雪一紳家甚富其妻以意造生塋人以僭  
制告委勘者奇貨其室安理知愚婦人無他先往毀  
其塋巨禍賴免卒年六十九子恂進士愷舉人著有  
鋤經堂詩文集論語口義夢餘筆談

鄭珍撰  
墓碑略

徐準字慕萊號立亭淵弟乾隆庚子進士授翰林院檢討陞福建道監察御史轉兵科掌印給事中  
外任臺灣道告終養歸卒準平居劬劬若無能者遇事侃侃卽發朋輩雖素狎常生憚心官御史時和珅權方盛一日入朝有御史跪拜珅準正色責曰此非我輩儀注焉得卑屈至此珅聞銜之一日謂曰汝食苦二十餘年矣尙不思差外任乎準曰差否皆君恩思之亦無益也次年已籤放漕河道珅短之別舉前拜疏者易準卒不稍屈他行事多此類

家傳

駱元亨字雁南嘉慶戊午

耳何與讀書事哉生平好靜坐言笑矜嚴雖接親狎  
無敢妄咳唾已亦無褻容也旁精醫方求輒獲效卒  
年七十三著有格致編素問集注

馬仕第 字及堂歲貢少孤自刻勵爲文閎偉試諸  
生輒冠曹學使陳本忠爲梓試卷識不識羣推畏之  
家赤貧歲恃館穀然性介寧窮餓無所苟求主講啟  
秀時與縣署劇譙優侑酒恥之徑出不合時宜老而  
益甚後銓選得教職歎曰數十年藜藿飽矣焉復慕  
丁胥爲不就年八十三無疾卒仕第與駱元賓李寶  
堂俱以能文困場屋後生達者多出其門而仕第酷

窮沒世士林悼之

金章聘 字莘田乾隆乙卯舉人積學敏於文晚授  
永寧州學政有善教聲

林國楨 字幹圃嘉慶辛酉拔貢少年才藻敏艷聲  
華爛然學使周鏐遴選貢士拈題限韻與諸生同賦  
國楨於難押字悉與鏐同遂首拔晚授鎮遠訓導卒  
嘗與金章聘鬥敏同題爲四六文限寸香就國楨稍  
遲而工過之章聘笑曰固不爭此一刻勝負也二人  
皆食貧有節操

陳懷仁 字含元號心齋生而識箴字故晚號識箴

後三年其母視之簞與草依然手跡其攻苦如此中  
乾隆戊申副榜選授興義縣訓導縣新設未久學宮  
不備制且就圯曰佐率邑人士重脩於筆山下卜建  
書院買田定租規條妥備招生童來肄業每朔日縣  
課之望日學課之二課外復私設課鼓舞振興文風  
大起嘗送考學使甚重之問應試遵義子孫幾曰佐  
對無人後又問對復然從者竊否之曰佐曰事甚便  
而名可恥故不肯爲也其有守類如是年七十四卒

傳

徐淵 字靜齋錫鬯子乾隆己酉舉人事母孝母

病篤每夜焚香禱天卒愈教弟子必令端品行性剛  
介主教湘川書院時有縣隸犯科來賄百金求中脫  
淵厲色卻之見貧困必施予家人或以無餘阻之淵  
曰必待有餘而後濟人則何時有濟人時也善醫有  
告卽往酬之不受時有無愧孝廉之稱

家譜

蘇必達 字誠之霖泓孫乾隆己酉舉人大挑知安  
徽歙縣在任卒年六十二必達自少赤貧教讀以養  
親父鯤病醫云補虛弱當多食燕窩力求得之不及  
進後大官不忍見此物以祿不及養遇生忌終日涕  
泣不已爲令日時肩輿至鄉村集父老子弟勉以孝

弟力田每鞠民訟慈祥若父兄民無不吐實者時有  
活菩薩之謠臨卒宦囊如洗士民醵助柩始歸  
戴柱字啟宇縣增生性耿介力求古處鄉人從  
學者多所成就貧約終身卷不釋手年七十一忽告  
其子曰吾得正而斃矣遂卒

胡達道字修五號雲巖乾隆甲寅舉人一試禮闈  
不第友教終身性孝友善誘後進郡人登甲乙榜者  
多出其門

李栢字青圃乾隆甲寅副榜原姓蹇明尚書義  
後先世由重慶徙家遵義栢幼卽異羣兒祖母老失



明其父常經紀外出栢謹扶持時湯藥事求得祖母  
歡讀書夜或束香照字不以爲苦生平不作欺人事  
數十年足不入城邑令鄧應台雅重其品屢招之卒  
不赴道光九年臬司李文耕令各縣公舉賢良方正  
邑咸舉栢栢曰不賢良方正則有之若云能然吾誰  
欺欺天乎固辭乃已終身自奉清約凡戚鄰貧乏者  
婚嫁喪葬必助之人咸推儒宿子寔臣舉人並公舉事實  
余從龍 宇際飛號雲亭幼失怙恃祖教之讀能自  
刻勵古今詩文詞每一篇出卽高人家貧甚持躬期  
古賢者於經史家國大端尤必究其源流得失常曰

士生古人後內無誼於身心外無濟於民物何用讀書爲乾隆乙卯舉於鄉以祖母老病及嘉慶戊辰始一會試卽揀發河南知縣初任商水力革雜派清釐驛弊適奉檄丈田僅取足額民皆安之邑東北地頻患水爲相高下開溝渠築隄防數十處地悉爲腴壤改知睢州甫至黃河決災數十州縣睢城不沒僅三版從龍招流徙禁侵漁請畱漕議蠲勸糶事事周至民賴以安嗣補洧川知縣從龍負經濟才廉直不阿事關民生休戚常力與上官爭不行不已尤敏於折獄所至摘奸發伏判決如流神君之號噪兩河間在

河南十餘年凡疑獄大半承訊訊無不得情者滑縣  
教匪平案株連千餘家審者務在羅織從龍曰若知  
其冤而不言非仁人君子所宜出也會大吏委讞此  
卒止誅其首及黨從數十人被誣者悉釋去後卓異  
第一陞光州直隸州知州丁祖母憂歸行至常德府  
病卒

狀行

胡天格

以行伍隨征大小金川累功補大定協右

營守備金川平陞上江協左營都司

**賞戴花**

翎補歸化營遊擊推陞閩浙督標中軍副將旋陞漳  
州鎮總兵補廣西提督因病告歸天格智胆過人技

藝嫻熟從征滇蜀數年大小二百戰並奮勇先登未嘗敗衄卒年七十五

劉惠由武舉分發雲南以千總從征金川累功補曲尋協左營守備陞臨元鎮標右營都司

戴花翎調補督標右營遊擊陞鎮雄營參將掣補龍陵協副將以征勦銅仁苗功陞鎮遠鎮總兵惠曉暢邊情謀勇俱足滇黔蜀用兵無陣不與奮呼前進雖鎗石重傷每不自覺亦多以此成功卒年六十

並公舉事實

張自信字貫五號斯未文遂子弱冠補弟子員歲試學使洪亮吉得文大驚特榜上一等寵異之謂能

入貴山便朝夕質當資四十金自信以親老辭嘉慶  
戊午舉於鄉大挑籤雲南知縣甫任新平民有夜逐  
賊而尸遠谷者驗多石傷一似鐵皆謂跌斃可勿問  
自信視死者當門池萍曰有竊魚否曰有不確然某  
夷似之因偵諸夷拘一巾裹頭者別致其幼子悉其  
居作用器命速取其樓門角倒立鐵尺來果得之有  
血跡一訊服罪蓋火竊魚主追與持尺者鬥羣拾石  
毆死投巖下歸人問何以知鐵尺所曰偶中耳殺人  
必慮家人知倉卒歸臥持柄登樓必隨手倒置門側  
惟急乃得之緩則變矣其他決獄類如是委署寧州

三月結新舊件三百餘牘時同僚歲報結案至百五十者卽美敘司吏向索錢與上考曰吾爲民耳豈爲升官哉不與敘亦不及州課士法壞爲定章程裁萬松山水井哨等寺之半助書院膏火象山銅廠盛路南知州某善諂驩巡撫請以廠來屬委勘官謂曰以屬寧州重違上司屬路南又不直盍調停自信曰皆國地屬路南不過我少得錢耳何調停之爲次年夏旱禱得雨乃大熟稻穗或三四岐馬產雙駒署梅菊皆再花州人盛作四瑞詩爲頌解任士民時來寓若家人父子問曰某此三年屈縱人幾何皆曰無一老

吏進曰惟某某杖三十似微過耳嗣署南寧祿勸兩  
縣廉能聲噪三迤巡道宋湘力以首縣薦辭曰某歸  
志久待實授博考妣封章耳安能變質直當上官乎  
補授河西知縣昧旦入境一攔輿呈者物塊然問知  
故笑曰若豈不聞我耶擲之受印集讞則其沙地爲  
武舉豪佔屢控以無賂屈計惟先豪賄庶直耳乃杖  
呈者而歸之地縣衙蠹甚力懲之時有張公到河西  
士民望恩吏役啼之語卒於官年五十七自信少盛  
文譽與陳懷仁金章聘余從龍稱遵義四傑然非所  
願惟民生利病究心獨切居官奉火烈水懦語爲大

要指陳上官前不避不阿嘗面斥同官某諛某數短  
之上官上官曰無求於人故不畏人吾且憚之爾何  
言哉與兩兄最友愛同年楊澤盛赴春闈以不習遠  
道拉同行半途楊病醫藥便旋日夕躬之抵京月餘  
楊卒自信親洗斂伴柩居朋友力勸移避不祥自信  
曰渠恃我始來今死舍渠去旅魂誰依乎試畢募同  
鄉歸其櫬論者謂可媿澆俗云

莫與儔撰傳

唐源準

字以平義伯曾孫嘉慶戊午舉於鄉貧不

能與計偕走依族父爲粵令者戊辰試春官不捷以  
知縣挑發粵東時海氛尙熾大府令出海擒盜者得



先補十盜以上予升擢同官勸請行分所獲辭之讞  
獄廣州監順德羅編潮陽保甲團練民勇韓司寇時  
爲粵撫器其能令署韶州英德縣縣豪李氏子殺人  
獻金二萬乞以人代償持不可拘之急不獲乃故密  
語人曰殺一人而耗其二萬金死者有知怨亦解矣  
但一出就質眾詞無異吾不深求也豪聞遣子出執  
法如前莫不懼服逾年制府以清遠盜賊充斥檄往  
治盜逃之他邑桴鼓無警會英德匪徒事覺部議鑄  
級制府奏畱得請令攝欽州州境自龍門踰松逕山  
迤海而西至白笠嶺百餘里皆沃壤明毛伯溫征回

五崗畫其地歸粵南夷民居者百餘家稱其先實伏  
波將軍所遺戍卒內地民往墾田至數萬頃歲輸微  
息於夷民夷民黠者覲其利以升科請願輸五千金  
助官源準謂僚友曰凡言利必先究思其害今日夷  
民無多措置誠易但吾民墾此田數世室家聚守一  
旦授之他人稱爲佃戶則予奪之權在田主田主坐  
收重利吾民日以貧困流離或爭鬥有罪逃入海中  
種種爲害且是區區者於國家不過太倉一粟置之  
度外已二百年今忽利之納諸版圖若大體何彼粵  
南土目寨向設於江坪水陸要害實與我龍門相控

扼海賊之擾始移寨退據砦街砦街形勢在內地則與我南柵門相峙在海面則與彼白麟尾相護今我遽自松逕山至白笠嶺添設汛弁粵南若借以爲辭且生事端矣聞者憬然其計慮深遠多此類補陽山令一歲餘病卒源準喪母後病腹痛痛卽腹欲裂遭大父喪出營葬費至一廢寺傍痛作大呼投地而殞若有人蹴之者曰起起所患頓失性儉素食無兼味居官日雖嚴冬未嘗重裘妾侍裙布而已行義不問有無族中孤露爲教養嫁娶者十餘人待以舉火者幾三十家敏於爲政事至立斷及卒陽山民奔走哭

弔若喪慈母

劉淳撰傳

劉佐國 字公弼號龍頷恩貢幼失怙事母甘孝母

沒廬於墓蔬水三年師事兩兄佐清佐乾至老猶坐  
立惟命兄或怒卽前跪受責于宋五子書有獨悟嘗  
作性說曰天所賦之理謂之性猶人所居之舍謂之  
宅性合仁義禮智信而成猶宅合柱枋門窗壁而立  
也舍柱枋門窗壁無以爲宅卽舍仁義禮智信無以  
爲性常試譬之仁柱也義枋也禮門也智窗也信壁  
也蓋于上精氣之渾含也基于下寸心之承載也雖  
其間氣質有美惡而君子善反之則所以爲性者無

不一猶材木有曲直而良工善運之則所以爲宅者  
無不同是故有是宅而後可以樂吾父子安吾兄弟  
處吾夫婦寓好吾朋友居王土爲王臣而君臣相維  
繫焉至于柱之有大小枋之有長短門之有前後窗  
之有左右壁之有上下則又仁義禮智信之詳且悉  
非一言所能盡也佛老之言性也空是指虛空而曰  
宅而衆人值其宅壞則又曰性惡曰善惡混是皆未  
得乎宅之說云爾主是宅者時而脩葺之存天理務  
藩籬之整密遏人欲絕宵小之窺謀父子親君臣義  
夫婦別長幼序朋友信庶幾居之安哉不然朽一柱

壞一枋缺一門陷一窗破一壁且不得爲宅况不孝  
不弟不忠不信聲色貨利剝喪天良猶之任風雨之  
漂搖而日傾圯耶哀哉失其性奚以爲人失其宅奚  
以庇身佐國持已嚴而外和易鄉子弟多從之學部  
選授教職辭不就年七十三卒所著有自娛文稿行略

文集

王槐森 字毅軒以中子歲貢天性孝友事母葛氏  
至八十五歲始卒與兄槐蔚終身同食怡怡如也善

詩工書法

遵義詩鈔

王青蓮

字希白號香湖恆子嘉慶壬戌進士改庶

常散館用知江南崇明縣遷督糧同知擢江寧知府  
陞山西冀寧道廣東按察使晉山東布政使卒年六  
十三青蓮自爲令以賢能稱道光三年水松江屬尤  
甚大吏特假以華亭印當七月之任禾稼漂沒民聚  
以待斃乃急請發錢粟且倡義賑民以免流亡崇明  
十潞海運稱難治洎還任而糧無延艘七年委以同  
知總理挑濬吳松江起青浦井亭渡止上海曹家渡  
凡萬八百八十九丈用帑二十九萬九千兩有奇工  
始終四月廣濶深通常濫原估啟壩水刷淤立盡遂  
爲永利十年守鎮江時兩淮方議改鹽政檄查辦場

竈弊悉得復往湖北勘鹽船散輪事諸富商憚發其  
奸私致巨萬爲壽意緩頰怒揮去而置如法條陳大  
府四事曰法禁船腳私帶曰飭商慎選船斯曰嚴定  
緝私考核曰委運減價蔽私凡數千言利病了了咸  
採入告著爲例十三年以冀寧道權臬篆時蒙古達  
喇特旗甲喇納令特古斯招耕本管牧地貝子達什  
多爾濟往勘逐致傷二等台吉薩吉音雅事

聞詔山西巡撫鄂順安選明幹道員會同歸化副都統惠  
顯審辦青蓮與歸綏道馳會讞於薩拉齊廳之包頭  
鎮皆欲重問耕人媚貝子青蓮曰漢民私墾寶蒙古



得錢所招惟首滋事當從重餘遞籍枷示足矣且當  
免追租入官資旅費諸人不能難卒從議定讞是冬  
特賜召見奏對皆稱

旨返任晉按察敬慎庶獄冤抑多所平反旋署布政事山  
東布政

命下未卽發藩廨有大樹中夜仆時舊疾方愈以悸復作  
遂卒青蓮在京改官時得母何病耗四十日走入千  
里比至不及見平生每言及未嘗不流涕尤篤宗族  
立義莊以贍族人貧乏者脩族譜建宗祠聚族子弟  
聘師教之省場添設號舍邑作黌宮郡設郵幼堂皆

千金贊之無難色著有金粟齋詩文行世莫與傳撰神道碑

弟青藜舉道光乙酉順天鄉試

王廷葵字愛園恆從子嘉慶辛酉拔貢朝考以知

縣用分發福建歷署順昌福鼎等邑所至有聲繼補

莆田縣丁母艱歸服闋仍補莆田邑故繁上治年餘

訟庭無事因修馮公隄見木蘭陂南北岸墮東角遮

浪海堤皆圯慨然以興利除害爲已任莆田環山貫

海唯中央平疇分南北兩洋沿海築堤以爲障木蘭

陂者下截海潮上障諸溪陂右疏二渠灌漑南洋三

十餘里田畝繞諸山爲大溝七小溝百有九立斗門

潦啟旱閉東角遮浪二鄉者皆逼海當大潮之衝無  
山爲之蔽昔人因其要害磊爲隄以禦潮而護田又  
於陂右隄首立萬金斗門分漑北洋田畝使永春德  
化仙遊滙三百六十澗之水灌田四十餘萬畝分食  
其利隄苟不壞則陂不損而溝渠亦無庸濬其制自  
宋始元明代有修葺嘉慶之季且潰且塞鹹潮害稼  
民不聊生賦無所出廷葵乃先治木蘭陂通邑人捐  
輸得銀四萬餘兩日興夫七八千人南北岸之堤堅  
修之大小百餘道溝渠深濬之三月而工竣督撫優  
敘入奏廷葵又謀築東角遮浪兩隄曰兩隄與木蘭

相表裏隄不築陂雖修渠雖濬無益也百餘年來  
築屢壞皆由工鉅費絀苟且爲之奚以久今不必海  
濫每歲秋濤盛漲二鄉之人老幼皆登陴而守不  
於溝壑者幾希乃大議捐築自傾貲萬一千有奇  
紳民爭來襄助廷葵爲究其易敗之失三揭其要  
二分其程目二十定隄勢固隄身立隄址實隄腹  
者視舊增二尺廣者視舊增三尺東角隄七百四十  
一丈遮浪隄四百二十三丈工始道光乙酉十二月  
成於戊子四月用銀十四萬有奇用石四萬九千五  
十丈餘悉稱是千餘年水利賴廷葵復其舊督撫

以功奏

命以同知直隸州充補旋卒年五十二卒之日宦橐空如

大吏憫其廉紓其逋莆人言者皆掩泣焉

王青蓮撰傳

宦廷銓字持平號衡園儒章孫少好學讀書小樓

十年不下有所思至忘寢食嘉慶辛酉拔貢戊辰以

署廣順州學正舉於鄉授印江縣教諭壬申縣大饑

斗米三千錢人食樹皮草根皆盡廷銓請令發粟不

聽乃自捐三百金爲紳耆倡共得數千金貴賈賤

以濟窮者及金盡新麥以登民全活甚眾旋去

耆相藉廷銓復倡捐施棺顧築不繼以艸薦

但掩埋先後不下數萬家家以此中落丁丑大吏以  
知縣薦因病告歸年五十七卒廷銓爲詩秀鍊有法  
書畫亦善

家譜

張書紳 字心泉極子幼卽嗜學諸儒講義獨探其  
精爲文宏放暢所欲言中嘉慶甲子鄉試五赴禮闈  
不售益鑽研經解所見日深從遊者多登甲乙榜友  
教於近今稱盛云年五十卒其弟書巖友愛甚篤試  
禮部歸中途聞書紳死氣絕者數至家悲不已亦卒  
書紳著有周官輯論毛詩輯論春秋輯論略行

夏國琦

字璞庵號小韓父文炯貴陽舉人訓導郡

學生國琦遂籍遵義國琦爲諸生時才名噪甚學使顧皋胡枚並賞異之嘉慶癸酉拔貢成均道光壬午成進士卽用知縣籤掣湖南初署藍山縣事縣多瑤人漢奸因緣其間嘗滋事瑤山向有瑤官二員至是且陰令瑤人出擾國琦嚴禁漢人不得擅入瑤山稟請責成瑤官定約束章程縣遂無瑤害旋補知攸縣教民耕種諸法添設書院膏火一切推誠士民化之丙戌夏發蛟水斗漲數丈民居官舍盡沒死者近萬人乃急捐廉勸倡設粥廠置義塚搭蘆棚賑民掩骼事事周至嗣湖撫來勘災撥發銀米賑貸國琦歷四

鄉清勘戶田畝月餘心力憊極病卒于署年四十  
一當文炯之死于獲鹿縣任也貧不能歸柩國琦方  
爲秀才嘗泣血無如何積館穀得二十金必北去歸  
柩邑令張人龍壯之助以五十金卽行至黃河冰初  
合念資將盡不能守凍遂履薄冰渡至河心一白鬚  
人止之曰前是卽陷矣因教以繞道忽不見人以爲  
孝思所感云

行狀

正安州

楊應麟字吉庵先世麻城籍卜居正安州天性仁  
厚嘗從亂軍中救擄略者二十餘人拾遺於道訪而



還之晚年屏跡林泉究心易理著有易經辨義三十

五卷

通志

鄭宜字垂裳弱冠爲諸生家貧晝耕夜讀嘗以

州自改流無以科目著者而羅雲師輩又以州無人  
借籍取顯蓋肆力經史嘗終夕不寐知州汪曾垣過  
其門召見叩其志曰宜得爲珍州冉從周足矣汪大  
喜曰果爾余當迎君於駟馬橋後果中康熙辛卯四  
川鄉試汪迎之如約顏其楣曰破天荒自後設教里  
閭弟子歲常數十州人知力學取科第者皆宜倡之  
也

韓之顯 字昭文生而穎異喜讀書行不少苟簡事親最孝爲程執深得先型領乾隆癸酉鄉解三試禮部不售里教以終年六十五

張尊 歲貢所居德溪里地僻無師年十五始就學卽慨然有化俗志積年研究於宋五子書深有所得三十後廣招學子以邑人學無根源徒窠襲程藝以倖弋獲故立教必以明義理爲宗從遊者無論貧富皆不取束脩親鄰有貸不償亦不問每歲終必聚鄉老幼教以孝弟力田同里近百家五十餘年無爭訟尊之化也卒年八十一

韓品金 字朝元恩貢家貧八歲時其父外出以新歲往賀族伯伯不禮告母張曰兒不讀書終身不獲出人頭地母遂命往從鄉先生學品金勵志刻苦橐王蜀黍粉水和之供朝暮食夜常乞友朋燈校油誦讀達旦年十五六與人傭闢荒藏書懷內每先眾傭往眾傭後卽略止出書讀之至仍藏前走復取讀常逐火伴往涪州羊角磧白馬鎮等處背鹽歸賣鄉市以供母及弟妹朝夕需偷隙讀書亦如作傭時年二十九欲應試往姊家借衣姊以家赤貧勸阻是年遂入學旋食廩餼藉館膳終其身受業成弟子員者近

二十人卒年六十九

並公舉事實

桐梓縣

侯朝柱 良柱弟由陝西入籍桐梓順治十三年以

千總從征打箭爐有功封武德將軍

公舉事實

李晉 字冀一康熙甲子舉人官廣東靈山知縣

博學多通創纂桐梓縣志爲雍正間邑令邱仲胆所

修藍本著有伴鐸吟集遺句云家貧莫望因官富質

淺方知借古深可以見其品學子銘詩字樵賡歲貢

著有詩文集

遵義詩鈔

藍田 由恩貢官湖廣武陵知縣歷陞知荆門直

隸州丁憂後陞江南鳳陽府知府護理鳳陽道告休  
主講敷文書院及郡之湘川書院前後裁成者衆卒  
年九十六

傅同人 字于野雍正癸卯舉人父之巖字來築貢  
生以學行稱詩文人爭傳誦同人孝友端謹言行必  
以禮義一日在館聞繼母病馳歸至中路遇一虎  
之曰當食則食不當食則去虎垂頭去之

蘇公泗 乾隆庚辰副貢官福建永福知縣告歸年  
八十餘卒公泗品學俱粹肄業國子監時有同邑副  
貢金正品在都病死徒步數千里歸其親人以爲難

趙式訓

字近光乾隆戊子舉人以大挑補直隸曲

陽知縣陞雲南大關同知歷署湖北浙江知府及浙

江糧道告歸道光戊子重宴鹿鳴式訓當官廉慎居

家恂恂一老書生任襄陽知府時值大兵勦白蓮教

匪式訓凡鞠得脅從者悉白大吏宥之賴全者眾雲

南再謀殺置尸於桶者八讞獄不定式訓勘得其情

之法時有青天趙黃桶之名

式謨貢生少從張甄陶遊好學不倦教授里中

就者眾

曾翕受

字虛齋乾隆辛卯舉人官湖北崇陽知縣

嘉慶元年白蓮教匪爲亂官軍勦之獲賊甚衆時翕受隨營審白寃民數百人悉釋之

馮振先 乾隆庚子武舉官終貴州上江副將初從征安南經略孫士毅深器之其從征湖北黃栢山賊帶兵三千追殺賊七十餘晝夜賊平獲婦女老稚及脅從者悉釋之因獲譴後額勒登保予開復並諭諸將以振先爲法乾隆已酉正安州火州牧校官適公出滿城皆燼振先署千總事學宮監獄賴保護獲免在上江時營虧項二萬三千有奇前官皆畏難遷就振先曰是虧公而擾兵也稟請查辦賣家產助賠公

私利之嘉慶辛未山東膠州大旱餓殍盈野振先時  
署副將與州牧商稟請賑計需時日因勸富紳孫某  
施粥以待所活無算州人立祠祀之以老乞休  
傳代鐸字牖堂乾隆癸卯舉人家貧館於外忽心  
動馳歸父病方劇割臂療之後官山東臨朐知縣清  
慎自持在任三載改教職歸買田納學爲邑人錄遺  
費

趙毓駒字盪溪武謨子乾隆壬子舉人大挑分發  
山東嘉慶十八年曹滑教匪謀亂事未發毓駒偵獲  
其黨詢得賊首林清姓名住籍奏入授陵縣知縣卓



異陞臨清州知州有戈二者滑匪餘孽也稱千人敵賊平匿朝城一紳家謀負固復亂東撫檄毓駒往捕至朝城邑令阻之曰此歷任所不敢問君之命豈獨輕耶毓駒曰某命誠不輕如君言則終聽之耶令不敢復言亦不敢偕往問帶役若干毓駒曰合朝城兵役不足敵一戈二某與四輿夫一老僕去足矣遂去未及境聞銃聲轟然夫僕無人色毓駒談笑自若甫入莊門有冠帶率荷戈者數百迎道左毓駒直至堂下輿冠帶者卽某紳也來謁笑曰公此行某知爲戈二戈二果在此然公何以擒之毓駒大言曰汝本好

漢未識朝廷大體故藏奸罪已重我今日來汝不獻  
戈二我必自往擒汝必先殺我若是早晚大兵來汝  
家無噍類矣紳嘿然久之乃曰公言誠是設某獻出  
戈二自累柰何毓駒曰得渠魁脅從者且宥况汝獻  
名賊功矣又何罪紳叩首曰唯命畱欵旣徹喚戈二  
前則偉丈夫也叱之曰汝卽隨趙官去戈二曰諾毓  
駒謂紳曰盍縛之紳笑曰彼去何縛若不去縛無益  
也卽從毓駒輿後去及城令驚喜曰我爲公一日不  
食矣毓駒爲人有胆識居官禮士愛民不畏權貴數  
平反疑獄卒於任歸之日民有哭送至百里外者署

濟寧時有宰相猶子以苞苴進毓駒返其物附以詩云昔年辛苦實難忘况有兒孫望顯揚我愛楊公四知語告天清夜靜焚香其人大沮

遵義詩鈔

曾廣涵字納嘉慶庚午舉人官山西孝義知縣有孀婦梁常氏其翁餽金三千求判改嫁不受爲立祠以成其節年五十五卒於官

趙鳴枝字梧岡道光壬午舉人制行不苟力學程

朱嘗著佛道論戒子孫勿崇二氏以爲家法

並公舉事實

綏陽縣

盧世選字占孚博學精易數性至友愛爲人正直

里有非理事怕恐選聞嘗於旅舍有婦頻窺至夜婦  
大相挑選峻拒之秉燭危坐至旦路拾遺金待其人

返還之康熙丙午中鄉試五十五年入祀鄉賢

綏陽志

黎庶瞻字以德貢生八歲喪父事母至孝剛方正

直言行不苟康熙五十五年入祀鄉賢

王紹堯字銘哉邑庠生博學能文吳逆亂後絕意

仕進邑人稱銘哉先生

陳仔字肩樵康熙己酉舉人博學尚氣節性剛

直寡交遊鄉人罕見其面閉戶著書力學篤行倡明

理學著尚書約旨六卷祀鄉賢

前同上

陳明經 字克常康熙丙午鄉薦孝親睦族狷介寡  
營僻處深山不入城市者十餘年任咸寧令潔清自  
勵絕暮夜金躬先教化一變四民剛暴氣習對兩造  
度理揆情輦而入者罔弗躍而出之鄰邑負枉控上  
官願發咸寧令者曰紛投明經嘗語人曰民罹於法  
哀矜不暇可還擊斷誇明察耶卽命盜大案不能使  
吐實跡輕用夾搜愚矣可假以催科快喜怒耶偶值  
蝗患齋出舍步巡原野痛哭呼籲蝗卽飛去鄰邑民  
圖其像徧遊田野間曰咸寧陳父在此蝗亦不集辛  
未全陝大饑詳請賑濟生活無算收育遺嬰九百餘

口時發帑招撫流亡分給牛種明經與尉吏誓曰此役中飽一文上欺下虐子孫不世事竣督撫奏聞加十七級畱任十三年以逃犯罣誤歸里咸寧及鄰邑父老號泣相送入棧達蜀境無何陝民聞訢罣吏扣尅牛種銀兩明經赴長安對讞方至寶雞咸寧民陸續舉旗來迎曰陳父來矣訊供時咸寧萬人同聲稱陳父仁廉願還我陳父天使愕然謂諸扣尅曰何不爲陳咸寧遂保舉授山東下河通判以勤勞卒祀鄉賢子六孫十俱列文行衣冠向廷廣廉吏傳別號春麓始於楚遷於綏遂世家焉自幼篤學沈潛燕處衣冠細行

必謹生於崇禎壬午康熙甲申孟冬卒於下河歸葬

宅東二里

羅其昌撰墓表

王道長

字吉人諸生家貧力學不忤不求種竹栽

花曠然自得邑令張最數造其廬顏其室居易軒

志

任聖時

諸生性至孝友因亂遁跡隱居邑之黑金

坪數十年不出戶年九十五卒

周易

字祖義貢生恬淡好學教授生徒終日危

坐與人有禮雖盛暑不去衣冠不好宴樂人無智愚

皆敬禮之年八十卒

鄭之命 字四長幼孤日夜對親主涕泣讀年十六  
爲諸生博學篤行值僞變隱居不出逆平授新津縣  
訓導教諸生先德行人文蔚起解組時年八十猶力  
學不倦

周鳳翽 字若雲乾隆丁巳進士幼聰慧十歲喪父  
奉母至孝游庠後學使晏斯盛以孝友薦不就通易  
善醫能詩文八分小篆及山水色調無不通曉

並同

楊駿烈 字行知號馭世乾隆乙丑進士官直隸廣  
平知縣在任四年告歸廣平蘭翁河額糧一千兩有  
額無地駿烈力白上官奏請豁免縣人於河上建楊



公祠祀之卒年六十四

李夢蓮 字相白乾隆庚午舉人官直隸束鹿知縣  
愛民禮士循良有聲束鹿縣志列名宦

傅汝桂 二歲而孤母張撫成乾隆庚辰進士選授  
四川射洪知縣任二載民稱清廉卒於官邑人祠之  
吳思陸 字華峯乾隆己酉舉人大挑改教訓導甕  
安在任捐修忠孝祠招寒士飲食教誨之多成就者  
性至孝事兩親晨昏無閒事繼祖母曾割股救之至  
壽九十五始終事繼母亦以孝聞

李映林 字蔚菴歲貢家貧好古成就後學甚眾

高抱潔視富貴如穢然工詩文著有蔚菴集並公舉事實

葉大鵬貢生勤學有守卒年百一十一歲能詩稿

盡佚有句云山氣白如晝夜光寒上衣遵義詩鈔

楊存慎貢生學守兼粹凡與生徒講藝必具衣冠

危坐教人以經義爲根柢身體而力行之塾旁一大

樹可庇數十人暑日坐其下令諸生習冠婚喪祭禮

節一日方與諸生講邑令沈鹿鳴過塾外竊聽久之

入而致敬曰先生之經學吾自愧不如也一日知家

人有牴牾謂之曰今日某招飲卽衣冠出家人因大

詬旋返而竊聽盡知之乃揚聲登堂家人問歸盍早

曰吾將近伊家聞門內詬詈聲盡露平日醜態殊笑  
人故不樂飲卽歸汝曹戒之倘吾家有此真堪笑倒  
矣因太息家人感悟相安如初

易道涵 字淵齋嘉慶戊午舉人性至孝父喪泣繼  
以血殯於堂事之如生事母張至壽九十三卒道涵  
研精經史不苟笑言選授平越州教諭未任卒年六  
十四主講洋川書院十一年成就者衆

並行略

王希曾 字丁南號省齋嘉慶戊午舉人由教諭官  
終安徽六安州同知性醇樸父母有怒見之卽解友  
於弟老而彌摯視猶子如子生平無重味重帛人有

急卽傾資救助不少悔閉居無愠容自爲秀才卽動  
必以正閭里行不善者私相語曰官刑非所憚以不  
可令省齋先生知之爲校官二十餘年日集諸生講  
論所造就登賢書者數十人在六安循分盡職不私  
謁長官常言聽天安命一生受用不盡妄求徒自苦  
耳署多隙地種竹數千竿暇卽手一編竹間坐宦橐  
蕭然怡如也年七十五卒於任

狀行

周霖 字雨蓬嘉慶辛酉舉人善事繼母友于諸  
弟先世所遺悉與之片瓦不受以授徒終老能文詞  
工書畫

田掄元 諸生少好俠折節讀書行義高甚邑令劉  
語諸生曰掄元澹臺子羽流也君等讀書力行  
當法之邑之重建 聖宮文昌廟董庀咸出其手

舉事實

余秉鑑 字永壺歲貢幼或失父母意卽涕泣跪請  
罪非命之起不起及長舉動必軌於正家貧卽教里  
中其父館於四川秉鑑每歲十二月解館卽馳省臘  
盡而歸如是十餘年無間入學後赴蜀婉委以迎歸  
意求父遊好者旁解其父必欲遲數年秉鑑至屢涕  
泣乃偕歸待第三人以友愛聞教人首孝弟次經術

遊其門入黌序者幾百人年七十一卒道光丙申邑

令朱右賢率秉鑑及門數百人爲建德教碑

狀行

吳湘

諸生言行不苟教弟子以身行爲先凡過

其側者必整肅衣冠與言必慎唯諾生平所讀書皆

手自錄八十餘猶作小楷年九十一卒

公舉事實

仁懷縣

卞運昌

字太和前明廩生世居蜀之江津甲申避

地因家仁懷之生界少以仲閔聞三黨與妻陳由壯  
至老歲至江津掃墓悲號數日哀動村墟及衰遣子  
代往必悲號送之餐蔬俟其返逢忌辰素服祭奠涕

泗失聲如初持桐竹時嗜學喜博綜每閱史遇張睢陽陸秀夫文文山諸人潸然隕泣遇李林甫秦檜輩輒髮上衝冠罵不置口平生抱恨滄桑林泉寄傲值溘氛或勸可出運昌拒之曰吾不能持長劍斬長蛇封豕顧不若舞馬弄猴乎居鄉濟困扶危某媼某嬰哺煖之垂數十年某孤男某孤女爲婚之嫁之某某無主柩爲厝之某某負租而貧憐而焚其券代之輸處江湖而抗懷獨善類若是年七十六卒次子貞康

熙巳卯舉人

向廷廣撰墓誌

任震遠

曜子僞永厯招令襲父職不就時稱節士

子珍邑諸生早卒遺孤永公甫七月母袁氏守志養  
且教學成爲名諸生凡鄉里聚會游燕或衣冠笑語  
不檢永公至人輒肅然卻避不妄交交卽終始不渝  
好諸名士往來其家或匝月不去禮之無倦客又善  
醫按方書爲藥以施人好成人美族黨子弟稍穎異  
者令來家就學貧不能具脩脯者爲之措置卽衣食  
亦解推焉始終無德色朱佩蓮撰家傳吳省欽任氏述德詩  
云仲連拒秦巨游抗述邁時孔愍守已斯吉父擅將  
才子貫儒術僞朝盜兵卻聘絕筆匪悼爲犧匪伺爭  
鵠我節如山人心似日高義嶙峋清流冽凜司戶右



丞厥身先失

震

母也

矢志而未逮旌拘限年格晦苦

節貞總帷蕭蕭練裳惻惻門無近親室有弱嬰疇任

卹廢而虛侮行之死誼亮未亡禮明曉促課業宵閔

哭聲推袁此事玉光永清袁氏彼高才生繫寡婦子壞

帔是承直鉤可使審機轉喉擇地布趾修修鶴潔舉

舉鵲起豆邊秩如脩脯藐爾存濟物心挾活人理殆

彥方徒或伯休比喆嗣逢時諗余述誅公

鄭之僑家貧力學以孝友聞申康熙壬辰進士授

翰林院編修未幾告歸閉門殫精深究程朱之理臆

然有得榮利澹如無子著述俱散失

張衡 幼奇窮常與人借書讀一過目輒不忘中

雍正丙午鄉試親友咸贐之令赴禮闈衡曰高堂歲暮倘不諱即幸博一第何補因授徒鄉里歲得脩脯以豐旨甘自奉寒暑一敝袍而已

並公舉事實

卞慶藻 字永衡號雪齋運昌孫自序先世出晉卞

壺甫十歲父母俱喪惟兄嫂是依性警敏讀書一目數行坐臥一樓非飲食不下領鄉薦三上春官不第教授里中請業者不遠千里痛弟慶潛補弟子員早沒刻訓其子霖卒成鄉貢人競稱之慶藻尙氣節見義必爲兩姊一適許一適安并孀守數十年爲請旌

建坊式閭里里有鹽井河當孔道懸崖數百丈水深且湍激多石舟不可渡舊有石橋水圯行者阻焉邑令商之慶藻慶藻募遠近得數百金持歸一武生賊藪也鳩竊去贓賊俱獲矣賊潛賄府以慶藻誣良報部部嚴駁經三年部催覆亟仍以原擬進奉

旨不准自督撫至府縣及承審官皆降三級無可降者革職慶藻亦罷去舉人後遂遍歷名山川足跡幾遍天下因迎

鑒

江南給九品頂帶嗣大都具呈傅忠勇公忠勇具奏代白

寃仍以知縣補用旋卒於京

任思正撰傳

卞雲龍 字起田號潤蒼慶藻孫慶藻通經史在京  
師買書數十百部遺囑縮衣食費買此子孫其寶之  
雲龍長能盡讀乾隆己酉成進士由翰林院庶吉士  
改戶部主事嘉慶九年補雲南武定直隸州知州歷  
署開化順寧知府所涖頌聲載道在開化時文山令  
王綱以虧庫免官死於獄遺孤女年及笄人知其淑  
爭聘之雲龍主力卻擇同鄉李錦麟者妻之後錦麟  
官廣西提督此女封夫人彌勒樂姓祖塋爲豪佔訟  
十餘年不決雲龍判直樂此塋子孫製一爵銘曰彌  
勒樂某合族頂祝躋堂稱獻嘉慶十二年暹羅所屬

之憂于臘部落與緬甸鬭涉及孟連土司界雲龍時  
署順寧檄土目率士兵嚴防各隘馳往緬寧諭憂于  
臘毋逗遛滋擾諭土司毋輕舉偏助憂于臘果受約  
邊釁以消方議題陞麗江知府遭母憂去服闋赴都  
行至安徽卒年五十一

阮元撰墓志

熊文瑞少習騎射入武庠鄉人賀之其伯父責之  
曰不讀書而如此一武夫耳何榮爲文瑞慚乃折節  
就塾期年學大進旋補弟子員中乾隆乙卯鄉試後  
官湖北黃梅知縣興利除弊善政爲多以隄決議罷  
大吏按臨賑災黃梅百姓數千人遮道言曰不願賑

濟願還我熊父母其得民如是卒解任士民斂錢資

其歸

略行

任思正

字廣平號舒軒永公季子幼失怙隨諸兄

讀乾隆己卯以拔貢舉於鄉大挑分發四川以器識  
見重大吏屢攝繁劇所至振興文教有惠聲在江安  
復義學田在興文置錦繡書田蜀人士至今稱之署  
會理州時州牧羅以先人賠項卸任時無力措繳自  
請查封任所衣物變價思正捐廉籌措代爲完解又  
爲經理其妻之喪人咸服其盛德嗣題補什邡知縣  
旋調署西昌值小金川用兵檄辦軍需銅鐵鹽氊並

採買馬匹諸務應期畢就而民不擾先是邑民承種  
營廠田所收不敷租民苦之思正力爲分晰勘以廠  
田仍歸營牧馬民困以蘇在什邡修文廟廣書院撥  
遵經閣田爲膏火資丁酉分校鄉闈得人爲盛歲值  
米貴以社穀之半借給糧戶以半減價平糶冬則製  
棉衣以施貧寒被澤者甚衆思正兼通堪輿書以父  
母葬地未宜卜數年始得之及啟柩均水濕因改殮  
權厝已有年至是諸兄以思正屢乞歸不許遂改葬  
思正以未親與聞信驚號心常忽忽如有所失又因  
積勞得疾卒年六十三思正惠政及民及歿聞者皆

失聲慟還日素服郊送者數千人子銘韓附貢孫清

臣舉人

王惟詢撰傳

鄧國學 幼父母俱喪力負苦學中乾隆乙酉鄉試授徒里中先以力行從遊者多所成就選授河南尉氏知縣居官以廉勤自勵愛民如子庭幾無訟後告歸民送者皆泣下年八十餘卒鄉人至今道盛德不衰

行略